

## Odömännoidi inänite **Pabodo nänö cadota ante yewæmongainta**

*Waa quëwencæminimpa, ante*

<sup>1</sup> Itota Codito ingante nē cædömo inte botö Pabodobo inömo inte iï cadota ante nē yewæmömo imopa. Wængongui botö imote apænte æninque iïmainö ante aa pegacäimpa. Bitö Pabodobi gote botö pönö cædö ante watapæ apænebi eñencædänimpa, ante angacäimpa.

<sup>2</sup> Mäninö, Wængongui æbänö pönö cæquiringä, ante watapæ apænedinque tömengä beyæ nē apænegainäni wëenëñedë pönï nänï tæiyæ waëmö yewæmongainö ante botö mäninö ante nē apænebo imopa. <sup>3</sup> Mäninö waa pönï nänö cæquinö ante iinque cæcæte ante cædinque Wængongui tömengä Wengä ingante da pönongä pongacäimpa. Tömengä iñömö waocä onguiñængä nänö baquinque Awënë Dabii wodi Pæingä inte eñagacäimpa. <sup>4</sup> Adocä Itota iñömö botö Wengä inongä ingampa, ante tömänäni edonque acædänimpa, ante odömoncæte ante cædinque Wængongui tæi piñænongä inte iïmai cægacäimpa. Iingä Itota Codito mönö Awënë iñömö Tæiyæ Waëmö ewocä inte do wæningä iñongante Mæmpo Wængongui wæætë nangui angä ate ñäni ömæmongacäimpa.

<sup>5</sup> Ayæ adocä tönö godongämæ cædinque tömengä emöwo beyæ mönitö imönite Wængongui

pönö waadete cægacäimpa. Ayæ, Minitö wabæca wabæca gote apænemini eñëninque tömämæ quëwënäni Itota Codito emöwo ante wede pönëninque në eñente cæte quëwënäni bacædänimpa, ante cædinque Wængongui adobaï Itota onompo inte mönitö imönite da godongä gotamönipa. <sup>6</sup> Ìninque tömämæ quëwënäni inänite Itota Codito, Botö gämænö pödäni, ante aa pedinque minitö iminite adobaï aa pecampa. <sup>7</sup> Minitö botö quimini badinque botö ayömö tæiyæ waemö ewocate quëwëmini bacæminimpa, ante Wængongui cægacäimpa. Ìninque minitö Odömä iñömö quëwëninque Wængongui quimini iñöminite botö, Acæminimpa, ante iïmaï ante yewæmömopa. Mönö Mæmpo Wængongui tönö Awënë Itota Codito waadete pönö cæyönate minitö wæætë gänë pönente bacæminimpa, äninque yewæmömopa.

*Odömä iñömö eñacæ pöinëmopa, ante*

<sup>8</sup> Minitö æbänö wede pönëminii, ante tömämæ quëwënäni tededäni eñënänipa. Ìninque botö iñömö Itota Codito emöwo apænedinque Wængongui ingante waa ate apænebopa. Wængongui bitö adobique pönö cæbi ate odömānoidi wede pönënanipa, ante apænebopa. <sup>9</sup> Wængongui Wengä ingantedö ante watapæ apænedinque botö Wængongui ingante në cædömo inte tömengä nänö änö ante ædæmö ewocadinque apænebo eñënänipa. Botö mänömaï cæbopa, ante në adingä inte Wængongui iñömö edæ, Odömānoidi beyæ ante Pabodo botö imote woyowotæ incæ itæde incæ apænecampa, ante në eñengä ingampa. <sup>10</sup> Edæ, Wængongui, bitö Ao ämi ate botö ñöwo odömānoidi

weca ēñacæ gobaiṃmopa, ante Wængongui ingante mīnitō beyæ ante botō cōwē apænebopa.

<sup>11</sup> Wængongui Ōnōwoca beyæ apænebo ēñēninque mīnitō tæi piñænte ēwocacæmīnīmpa, ante cæcæte ante botō mīnitō weca ēñacæboīmpa, ante wæbopa. <sup>12</sup> Edæ mīnitō botō wede pōnēnō beyæ wampo pōnente bayōmīni botō wæætē, Mīnitō wede pōnēmīnīpa, ante adīnque adobaī wampo pōnēmo īnīnque mōnō pōnencabo godongāmæ wampo pōnēninque godōmenque tæi piñænte entawengæīmpa, ante pōnēninque botō mīnitō īmīnite aīnente wæbopa.

<sup>13</sup> Botō wabæca quēwēnāni weca gote apænebo ēñēninque pancadāniya wede pōnēnāni badānitapa. Īnīnque, Botō mīnitō weca gote apæneyōmo wadāni pancadāniya adobaī wede pōnencædānīmpa, ante cædīnque botō æpogamē incæ poncæ cæyōmo edæ wææ cæte intapa. Īnīnque botō, Tæmpo poncæ cætabopa, ante yewæmōmo ate ēñencæmīnīmpa, ante yewæmōmopa. <sup>14</sup> Edæ guidiegoidi incæ wadāni incæ, ocai encadāni incæ ocai ōmæcadāni incæ ædānimē īñōñānite botō debe intē bai edæ tōmānāni īnānite odōmonte apænequēnēmo īnōmo īmopa. <sup>15</sup> Mānōmaī beyæ mīnitō Odōmā īñōmō quēwēmīni īñōmīnite botō mīnitō īmīnite adobaī mōnō Codito ingantedō ante watapæ apænecæte ante nanguī cæinente wæbopa.

*Mōnō tæi piñænte ēwocadō Codito beyænque impa, ante*

<sup>16</sup> Mōnitō oodeomōni īñōmōnite tāno apænedīnque Wængongui īñōmō mīnitō oodeoidi īnāmaī īñōmīnite ayæ adobaī apænedīnque, Mīnitō wede pōnēmīni adīnque Codito waa

pöni pönö ængä beyænque quëwencæminimpa, ante tæi piñænte cægacäimpa. Ìninqe mäninö Codito ingantedö ante botö iñömö watapæ apænedinque, Wængongui tæi piñænte nänö cægainö impa, ante pönente wædinque edæ guiñenedämaï inte do apænebopa. <sup>17</sup> Mönö wede pönemö iñömonte Wængongui mänine ante odömonte watapæ apæneca beyænque mönö nö cæte quëwëmö bagamöimpa. Mänine beyænque godömenque wede pönente badinque mönö wede pönönö beyænque quëwëmpa. Ìninqe docä iñömö Wængongui beyæ yewæmöninque, “Në nö cæte quëwëngä incæ tömengä nänö wede pönönö beyænque quëwencæcäimpa,” ante nänö yewæmongainö bai edæ do batimpa.

*Mönö waocabo wentamö mongænte wæmompä, ante*

<sup>18</sup> Në wiwa cædäni guiquënë wiwa nani cædö beyænque wadäni edæ Wængongui nö pöni nänö apænegainö ante ædö cæte eñenguinänii. Ìninqe Wængongui ingante në wiwa cædäni nani eñenämaï ininö ante godö piininqe tömengä öönæde ongöninque wiwa nani cædinö beyænque do pangä wædäni edonque amompä. <sup>19</sup> Wængongui, Botö æbodö imoo, ante tömämini edonque pöni eñencæminimpa, ante cædinque tömämö imonte odömöninque tömënäni inänite adobaï edonque pöni odömongä wægadänimpa. <sup>20</sup> Wëenëñedë pöni në quëwengainäni tönö ñöwo ganca quëwëmö adobaï, Wængongui mönö në adämaï inongä inte æbänö quëwengäa, ante eñencæte ante wægaimö inömö inte mönö tömengä nänö badongaincooque

adique edæ edonque pöni acæimpa. Edæ, Tömengä ñimpo cädämaï inte cöwë nē tæi piñænongä ingampa, ante ayæ, Nē Wængongui ñongä ingampa, ante wædique mönō waocabo edonque aquenēmō imompa. Ññæmpa eññämaï intabopa, ante ædö cæte anguii.

<sup>21</sup> Wængongui ingante do ate bai ingainäni incæte waodäni tömengä ingante edæ, Bitö Wængongui ñäo emönömi imipa, ante edæ änämaï inönänimpa. Wængongui ingante waa ate pönente apænedämaï inönänimpa. Mänömaï ocai ömæcadäni bai mimö ömædenäni bai badique tömenäni wentamö entawenäni bagadänimpa.

<sup>22</sup> Ocai encamöni imönipa, ante änäni incæte tömenäni wæætë mänömaï cædique ocai ömæcadäni bagadänimpa. <sup>23</sup> Edæ Wængongui wænämaï nē Quëwengaingä ññongante tömenäni wæætë godö Baa angadänimpa. Tömengä nänö ñäo emönö ante piinte cædique tömenäni wæætë waomö nē wæwocamö mönö emönö bai badöningue, öömä eñädäni nani emönö bai badöningue, ocagui eñädäni nani emönö bai badöningue, ocagui ömaadäni nani emönö bai badöningue tömenäni, Mönitö wængongui ingampa, ante cædönänimpa.

<sup>24</sup> Mänömaï cädäni ate wædique Wængongui, Minitö mini cæinente wädö ante ee abo cæcæminimpa, ante da godongä wadæ godique tömenäni baonga nani ñömæi mongæte quëwenguingue cædönänimpa. Ññique nana gæncaya nana gæncaya nani monguënönö ante Baa ante guññädämaï inte cædique wacä ingä wacä ingä godö wiwa cædönänimpa. <sup>25</sup> Wængongui näwangä

pöni nänö apænegaïnö ante tömënäni Baa äninque mä pönëninque nãni babæ apænegaïnonque ante Ao änönänimpa. Mänömaï cædönäni inte tömënäni wæætë Wængonguï nänö nê badongaincoo weca ædæ wææninique, Mönitö wængonguï impa, ante cædinqe nê Badongaingä ingante edæ ëmö cæte wadæ gogadänimpa. Incæte tömengä nê Badongaingä ïñongante mönö waocabo inguipoga mönö quëwëñedë ayæ ate miinguiipo bayonte wantæpiyæ mönö quëwëñedë Wængonguï ingante, Bitö tömëmi toquinque pönö waa cæbi æmönipa, ante mönö apænecæimpa. Mänömaï impa, ante Amëë, ämopa.

<sup>26</sup> Mänömaï cæyönänite Wængonguï, Minitö guïñëñadämaï mini toïnente wædonque gobæwedäni, ante da godongä gogadänimpa. Ìninque onquiyænäni incæ, Nê onquiyæmo ïnömo inte botö onguïñængä tönö monguënëmo ïmopa, ante änämaï ïnäni inte godö wacä onquiyængä tönö towente möwënönänimpa. <sup>27</sup> Ayæ onguïñænäni incæ adobaï cædinqe, Botö onguïñæmo ïnömo inte onquiyængä tönö monguënëmo ïmopa, änämaï ïnäni inte godö wacä onguïñængä tönö möïnente gonga bæco baï toïnente wædäni bagadänimpa. Ìninque cöwë nãni waa quëwenguënënö ante Baa äninque nãni onguïñæncabo ïnönäni inte wïwa cædönänimpa. Mänömaï cæyönänite Wængonguï eyepæ pöni godö pangä wædinqe tömënäni wïwa nãni cædö beyænque nãmä baonga caate wæwengadänimpa.

<sup>28</sup> Wængonguï ingante mönö pönente ëñengæimpa, ante tömënäni, Önonquedö ante

impa, ante tedeyönänite Wængongui wæætē, Ocaidē wentamō encadōmini inte edæ waomīni mīni wīi cæquēnēnō incæ ee abo cæbæwedāni, ante da godongā gogadānimpa.

<sup>29</sup> Tömēnāni iñōmō nō cæquināmaī ināni inte do wīwa cædānique badinque iīmaī cædānipa. Wacā ingā godō towēninque tōmēnāni wadāni inānite nē wēnæ wēnæ cædānique inānipa. Māincoo ante æinente wæwēnāni inte tōmēnāni, Wacā gomonga ængā ingante godō piinte adānipa. Ayæ edæ, Mōnō godō wængongæimpa, ante cædinque do cædānipa. Guēadō guēa piinte cædānipa. Wacā oda cæcæcāimpa, ante ancaa cædinque tōmēnāni godō babæ cædānipa. Ayæ nē wīwa pōnēwēnāni inte tōmēnāni, Wadāni wæcædānimpa, ante godō piinte cædānipa. Godō wæntaa godō wæntaa tedewēnāni inānipa. <sup>30</sup> Ayæ wadāni inānite piīninque iīnāni iñōmō godō babæ ante tedewēnāni inānipa. Wængongui ingante piinte cædāni inānipa. Ayæ, Tōmēmoque waēmō imopa, ante nāmā ængō cæte bai cædinque wadāni inānite wææntodonte bai āninque, Ōnonquedō cæcantedō abii, ante godō piinte todāni inānipa. Edæ, Æbānō godōmenque wēnæ wēnæ cæte toquīmoo, ante edæ pōnēē cōninque edæ nanguī cædānipa. Mæmpocā tōnō badā, Cædāni, añōnate tōmēnāni eñēnāmaī cædānipa. <sup>31</sup> Mīmō òmædēnāni inte tōmēnāni ocai òmæcadāni bagadānimpa. Cæcæboimpa, āninque edæ iinque cædāmaī inōnānimpa. Wacā caate wæcā adinque godō waadedāmaī inōnāni inte tōmēnāni edæ godōmenque piīnāni inte cædōnānimpa.

<sup>32</sup> Mānōmaī cædāni iñōmō nāni wænguinque cædānipa, ante Wængongui nō pōni nānō angainō

ante tömënäni önömoncaque në eññänäni inte tömënäni näni wënæ wënæ cæinënouque ante cædänipa. Ayæ tömënäni wiwa näni cædö bai wadäni adobaï cædäni adinque tömënäni, Waa cæminipa, äninque në cædäni inänite waa adänipa.

## 2

### *Nöingä ante Wængonguï apænte angampa, ante*

<sup>1</sup> Tömënäni mänömaï cædänipa. Incæte bitö adobaï wiwa cædömi inte tömëmi pante wæquinque tömënäni inänite apænte ämipa. Ìninque bitö wacä ingante, Bitö pante wæquinque wiwa cæbipa, ante apænte ämi inte bitö inæmpa adobaï wiwa cædömi inte edæ æbänö cæte nämä ante wææ anguïmii. <sup>2</sup> Wiwa cædäni inänite apænte äninque Wængonguï cöwë nöingä ante apænte angampa, ante edæ do eññemompa. <sup>3</sup> Ìninque waobi önömique inömi inte bitö inæmpa tömënäni inänite apænte ämi incæte tömënäni näni cædö bai adobaï cædömi inte edæ, Wængonguï botö imote pänämaï inte ata cæpocæcäimpa, ante pönëmitawo. <sup>4</sup> Bitö wiwa cæbi inte Ca ca wæquënëmi inömite Wængonguï wæætë ee pänämaï inte nanguï waadete pönö cæyongante bitö wæætë edæ piïninque Baa ämitawo. Ìnæmpa tömengä, Bitö, Æmæwo wënæ wënæ cætabopa, ante wædinque botö gämænö poncæbiimpa, ante Wængonguï pönö waadete cæcampa, ante pönëmiyaa.

<sup>5</sup> Incæte bitö mimö ömædëmi inte ancaa Baa äninque edæ wënæ wënæ bitö cædö ante ñimpo cædämaï inömite Wængonguï nänö ænguï baquiönæ iinque bayonte tömengä ænguï pönï badinque



godömenque pangä wæcæbiimpa. Tömengä æbänö nō apænte angää, ante mǎniñedē ate edæ edonque acæimpa. <sup>6</sup> Edæ, Tömämö mönō cægai ganca ante Wængongui eyepæ pōni pædæ pōngä æncæmöimpa, ante dodāni nāni yewæmongainō bai edæ iinque bacæimpa.

<sup>7</sup> Iinque, Mönō ñäö bai entawengæimpa, ante cædinque ayæ, Wængongui mönō imonte waa adinque pōnō cæcä ate mönō wæwocadāmai ewocacæimpa, ante cædinque mönō wæntædāmai inte ee waa cæte quëwëmö iinque Wængongui pōnō cæcä ate mönō cōwë wænāmai quëwëmaïmompä. <sup>8</sup> Wæætë, Wængongui nāwangä nānō apænedō ante Baa äinque, Tömëmo beyænque quëwencæboimpa, ante nē änāni inänite ayæ wadāni wiwa nāni cæquïnonque ante nē tee empote godāni inänite Wængongui ængui badinque godō piinte cæcæcäimpa. <sup>9</sup> Edæ mönō waocabo wënæ wënæ cæmö adinque Wængongui oodeomöni iñömönite täno päninque oodeomini ināmai imini iminite adobai päñongä nē wënæ wënæ cæmö tömämö iñömö edæ caate wæwencæmöimpa. <sup>10</sup> Wæætë waa cæmö adinque Wængongui oodeomöni imönite täno pōnō waadete cædinque oodeomini ināmai imini iminite adobai pōnō waadete cæyongä nē waa cæmö wæætë gänë entawëinque ñäö apäite bai entawëñomonte edæ Wængongui tömämö imonte waa acæcäimpa.

<sup>11</sup> Edæ mönitö oodeomöni imöni incæ mïnitö oodeomini ināmai imini incæ Wængongui tömämö imonte adoyömö pōni adinque wadö wadö ate pönente cædāmai ingampa. <sup>12</sup> Möitee wodi, Iïmai cæedāni, ante nānō wææ angainō ante

ömæmoncadäni inte wīwa cædäni ĩninqe tōmengä nänö wææ angainö dæ ante bai mänināni wæncædānimpā. Wæætē Möitee wodi nänö wææ angainö ante do eñente ēmoncadīnāni incæte wīwa cædäni adinqe Wængonguī mänine ante eñenāmaī cædäni beyænque apænte āninqe pangä wæcædānimpā. <sup>13</sup> Edæ Möitee wodi nänö wææ angainö ante önömoncaque eñenāni inte tōmēnāni nāni önömoncaque eñenö beyænque Wængonguī ayongä dicæ nö cædäni badāniyaa.

Wæætē edæ mänine ante eñente cædäni ĩnānite guiquēnē Wængonguī pönö angä ate tōmēnāni ĩñömö nö cædäni bacædānimpā. <sup>14</sup> Edæ Möitee wodi nänö wææ angainö ante ömæmoncadäni inte oodeoidi ĩnāmaī ĩnāni incæ pancadāniya tōmēnāni dodāni nāni wææ angainonque ante Ao ante cædinque Wængonguī nänö wææ angainö bai edæ do cædānīpā. Mänōmaī eñente bai cædinque tōmēnāni mīmō entawēnāni inte mänine ante ömæmoncadäni ĩnāni incæte nāmā nāni wææ ānonque eñente cædānīpā. <sup>15</sup> Edæ, Tōmēnāni dodāni nāni wææ angainö eñeninqe waa cædäni inte tōmēnāni Wængonguī nänö wææ angainö bai do entawēnānīpā, ante edonque acæimpā. Mīmō entawēnāni inte tōmēnāni nāni caboque godongāmæ pönēninqe wēnæ wēnæ nāni cædōnō ante nāēmæ apænte wææ ānānīpā. Ayæ wæætē waa cædäni ate tōmēnāni nāēmæ apænte ñimpo cædānīpā.

<sup>16</sup> Codito ingantedö ante watapæ eñengaīmo inte botö ĩmaī ante apænebopa. Wængonguī angä eñente cædinque Itota Codito wæætē waomö mönō awēmō entawēnō ante edonque pōnī ad-

inque apænte ancæcäimpa. Tömengä nänö apænte angüönæ iinque bayedē edæ mäninö ante botö yewæmonte apænedö bai edæ iinque bacæimpa.

*Möitee nänö wææ angainta adinque oodeoidi wii eññänäni*

<sup>17</sup> Bitö iñömö edæ, Oodeobo inömo imopa, ante ämipa. Ayæ, Möitee wodi nänö wææ angainta nē eññemo inte botö Wængongui ayongante waa quëwëmo imopa, ante edæ nämä ængö cædinque ämipa. <sup>18</sup> Wængongui æbänö angää, ante do eññemipa. Ayæ tömengä nänö wææ angainö ante do eññemi inte bitö, Quinö waa i, ante do eññenique Ao ante æmipa. <sup>19</sup> Bitö, Wadäni babetamö bai ewocayönänite botö töö æmænte mäobo godänipa. Wëmö iñömö quëwente bai adämaï iñönänite botö iñömö, Acæminimpa, ante tica ënente bai odömonte apænebopa, ante edæ, Näwangä ämopa, ante bitö apænebitawo. <sup>20</sup> Ayæ adobai, Mönö Möitee wodi nänö wææ angainö ante eññente beyænque mönö eññenguënönö ante entawëninque mönö nö cæquënönö ante adobai tömänö ante entawengæimpa, ante bitö pönëmitawo. Ayæ mänömainö ante bitö pönönö beyæ bitö, Nē oda cædäni inänite botö nē töingä odömömo imopa, ante pönëmitawo. Wëñænäni bai wædænque eññänäni iñönänite botö nē odömonte apænebo imopa, ante pönëmitawo.

<sup>21</sup> Iñæmpa mänömaï inömi inte bitö edæ dicæ nämä odömonte apænete eññemitawogaa. Wadäni inänite odömonte apænedinque, Awëmö ænämaï iedäni, ante odömonte apænedömi inte tömëmi awëmö æmitawo. <sup>22</sup> Bitö wadäni inänite odömonte

apænedinque, Nänöogængä inämaï iñongante godö guëa mönämaï ië, ante nē wææ ämi inte bitö adobaï wacä tönö guëa mömitawoo. Ayæ, Wængongui ingampa, ante nāni badöinca ante nē pīimi inte bitö edæ tömēnāni nāni apæneincönē go guiidinque edæ ö æmitawoo. <sup>23</sup> Iñæmpa bitö, Möitee wodi nänö wææ angainö ante botö eñente cæbo imopa, ante tededinque nāmā ængö cædömi inte edæ mänine ante eñēnāmaï cæbi adinque wadāni wæætē Wængongui ingante waa adāmaï inānipa töö. <sup>24</sup> Edæ, “Minitö cædinö beyæ oodeoidi ināmaï ināni incæ Wængongui emöwo ante godö babæ ante wēnæ wēnæ ānewēnānipa,” ante tömengä beyæ dodāni nāni yewæmongainö baï do batimpa.

<sup>25</sup> Edæ Wængongui nänö wææ angainö ante eñente cæbi ininque bitö, Nāwä oodeobo imopa, ante nē eö togæimi badinque waa imaimpa. Wæætē edæ eñēnāmaï cæbi ininque oodeo ināmaï ingä bagäacä ingä baï bitö iñömö edæ do babaïmipa. <sup>26</sup> Oodeoidi ināmaï ināni guiquēnē bagäadāni ināni incæte tömēnāni Wængongui nänö wææ angainö ante eñente cædāni ininque Wængongui ayongä tömēnāni do eö togæināni baï inönāni inte oodeoidi baï inānipa. <sup>27</sup> Bitö iñömö Möitee wodi nänö wææ yewæmongainta mänimi inte nē eö togæimi imitawo. Bitö mänömaï imi incæte eñēnāmaï cæbi iñömi wacä wæætē bagäacä inongä inte eñente cæcä ininque tömengä eñente nänö cædö beyænque Wængongui wæætē bitö imite apænte āninque pancæcāimpa.

<sup>28</sup> Iñæmpa oodeo eñagaingä inte baö beyænque oodeocä ingä incæte tömengä wii mänömaï ingä

beyænque näwä oodeocä ingampa. Adobaï nē  
 eö togæingä iñömö baonque nänö eö togæinö  
 beyænque tömengä Wængongui ayongä ædæmö  
 eö togæingä bai wii ingampa. <sup>29</sup> Wængongui  
 Önöwoca ingante nē ewocacä guiquënë tömengä  
 iñömö edæ näwä oodeo bai badinque Wængongui  
 wēñængä ingampa. Edæ Möitee wodi nänö wææ  
 yewæmongainö ante eñente eö togæinique  
 waocä tömengä wentamö nänö entawenö dicæ  
 wido cæquiringä. Wængongui Önöwoca guiquënë  
 pönö wido cæcä beyænque waocä wæætē waëmö  
 entawengampa. Mänömaï entawengä ingante  
 wadäni waa adämaï inäni incæte Wængongui  
 wæætē, Bitö waa entawemi abopa, äinique  
 tömengä ingante waa apænecampa.

### 3

<sup>1</sup> İinique oodeocä iñömö edæ, Oodeobo imopa,  
 ante toquënegä ingantawo. Ayæ adobaï, Botö  
 eö togæimo imopa, ante toquënegä ingantawo.  
<sup>2</sup> Ao ämopa. Nē oodeoidi inönäni inte tömënäni  
 cöwë nanguï toquënenäni inänipa. Edæ Wængongui  
 apænecä eñengainäni inte edæ oodeoidi tömengä  
 nänö apænedö ante nē mangainäni inte nē to-  
 quënenäni inänipa. <sup>3</sup> Mänömaï i incæte pancadäniya  
 iñömö edæ wede pönënämaï inänipa. İinique mönö  
 æbänö anguii. Tömënäni nänï pönënämaï inö  
 beyænque Wængongui tömënäni inänite dicæ ñimpo  
 cædinque ædæmö aadämaï ingantawogaa. <sup>4</sup> Ædö  
 cæte mänömaï inguii. Mönö waocabo tömämö nē  
 babæ apænemö iñömonte Wængongui iñömö nö

pöni cæcä ingainö anguënë. Edæ tömengä beyæ iimaï ante yewæmongatimpa.

“Wængonguï bitö æbänö apænebii, ante apænte ancæ cædäni incæte tömënäni, Wængonguï nö pöni ante apænecampa, ante edonque acædänimpa.

Bitö nē tæi emömi inte edæ bitö imite nē apænte ancæ cædäni inänite näemæ edæ wææntodonte bai cædinque edæ gänä cæcæbiimpa.”

Ante näni yewæmongainö bai edæ bacæimpa.

<sup>5</sup> Waodäni mä pönëninque iimaï ante tedewënänipa. Mönitö wiwa cæyömönite Wængonguï nö cæcä adinque wadäni, Wængonguinque nē nö cædongä ingampa, ante godömenque edonque acædänimpa. Ininque wiwa cæyömönite Wængonguï quïnante piinte pangää, ante tedewënänipa. Mänömaï tedewënäni adinque mönö wæætë æbänö anguënëmö imöö. Inæmpa waodänique näni änewënö bai dicæ anguënëmö imongaa. <sup>6</sup>Ædö cæte mänömaï änewenguïi. Mäninö näni tedewënö näwangä i bai inguipoga quëwëmö imonte Wængonguï apænte änämaï inguënengä.

<sup>7</sup> Wadäni guiquënë iimaï ante tedewënänipa. Wængonguï cöwë näwangä ante apæneyongante botö babæ apænebo adinque wadäni, Wængonguinque näwangä ante apænecampa, ante tömengä ingante godömenque waa acædänimpa. Ininque babæ botö apænedö beyænque Wængonguï godömenque ñäö apäite bai emongä ingampa. Ininque, Bitö nē wënæ wënæ cæbi imipa, ante Wængonguï quïnante botö imote apænte angää,

ante tedewēnānipa. <sup>8</sup> Tömēnāni, Wængonguī ingante godōmenque waa acædānimpa, ante mōnō godōmenque wēnæ wēnæ cæcæimpa, ante tedewēnānipa. Tömēnāni nāni tedewēnō nāwangā ī bai mōnitō adobai ante ancædōmōnimpa. Edæ, Tömēnāni nāni tedewēnō bai edæ Pabodoidi adobai ante apænedānipa, ante pancadāniya pōnō wēnæ wēnæ ante babæ apænedānipa. Mānōmai ante nē apænewēnāni īnānite pāninque Wængonguī nō cæte pangampa.

*Tömāmō mōnō pante wæquinque wentamō mongæmompā*

<sup>9</sup> Īninque æbānō ante anguī. Mīnitō oodeoidi īnāmai ōnōmīnique īñōmīnite mōnitō mōni oodeocabo dicæ godōmenque waa pōnī imōniyaa. Īñæmpa mōnitō oodeomōni incæ mīnitō oodeomīni īnāmai imīni incæ tōmāmō nē wēnæ wēnæ cædōmō imompā, ante do odōmonte yewæmōmōni abaimīnipa. <sup>10</sup> Edæ īmai ante Wængonguī beyæ ante āmotamīni ante bai yewæmongatimpa. “Nē nō cædongā īñōmō edæ dæ angampa.

Adocanque incæ edæ dæ angampa.

<sup>11</sup> Nē ēñente pōnengā īñōmō edæ dæ angampa.

Wængonguī ingante ante nē diqui diqui mīnongā īñōmō edæ dæ angampa.

<sup>12</sup> Tömānāni edæ oda cæte wapiticæ godinque,

nāni waa cædāmai incaboque badānitapa.

Nē waa cædongā īñōmō edæ dæ angampa.

Adocanque incæ edæ dæ angampa.

<sup>13</sup> Waodāni īnānite wænoncæte ante ææ ænete bai ēmencadinque,

tömānāni babæ ante enguēnēwate tedewēnānipa.

Edæ tæntæ tömëmæ ënete bai, Wæmongæimpa,  
ante ënedänipa.

14 Tömënäni piinte nani tedewënö beyænque mon-  
capæ ti nä bai enguënëwadänipa.

15 Tömënäni wæmonguïwaque pogodo goquïwaque  
ëwadänipa.

16 Tömënäni në godö wænönäni inte mäincoo wido  
cæte wodii godäni ate edæ mü quëwënäni  
ponte adinque caate bai wæwënänipa.

17 Në piinte cædönäni inte tömënäni Wæmonguï  
taadö tömengä gänë entawente nänö godönö  
ante adämaï inte cædänipa.

18 Tömënäni, Wæmonguï ingante mönö guïñente  
ëñengæimpa, ante pönënamäi inänipa.”  
Ante dodäni nani yewæmongainö bai impa.

19 Æcänö Möitee wodi nänö wææ angainö ante  
në ëñente quëwenguënëna inaa tömengä beyænque  
ante wææ yewæmongatimpa. Mänömaï i beyæ,  
Botö eyepæ cæbo imopa, ante mönö ædö cæte an-  
guï. Edæ guïñënete mönö pæ wëenecæimpa. Ayæ  
inguipoga tömäo quëwëmö tömämo Wæmonguï  
në apænte angä weca ongöninge edæ, Æbänö  
cætaboo, ante Wæmonguï ingante mönö edonque  
apænequënëmö imopa. Mänömainö ante edæ do  
ëñëmopa. 20 Mänömaï beyæ Wæmonguï, Möitee  
wodi nänö wææ angainö ædæmö ëñente cæbi  
beyæ bitö botö ayömo në nö cæbi babipa, ante ado-  
canque ingante edæ änämaï incæcäimpa. Wæætë  
mänine nänö wææ angainö ëñente beyæ mönö,  
Në wënæ wënæ cæmö imopa, ante edonque  
amopa.



*Mönö wede pönönö beyænque nö cæte quëwëmompä, ante*

<sup>21</sup> Wïi Möitee wodi nänö wææ angainö ante ëñëmini beyæ wæætë edæ Wængongui incæ pönö badongä beyænque mönö tömengä ayongä nö cæmö bamompä, ante ñowo pönï odömongatimpä. Dodäni Möitee wodi tönö Wængongui beyæ në apænegainäni iñömö, Ìncayæ ate mänömaï bacäimpä, ante do yewæmongadänimpä.

<sup>22</sup> Wængongui pönö badongä ate mönö në wede pönëmö iñömö Itota Codito ingante mönö wede pönönö beyænque edæ tömämö tömengä ayongä nö cæmö bamompä. Edæ mönö adoyömö ingaimö inte önömonque imompä. <sup>23</sup> Ìninqe mönö tömämö wënæ wënæ cæmö inte Wængongui nänö ñäö bai quëwëñömö guicæte ante cædinque wïi eyepæ cæmö inte wïi guimompä. <sup>24</sup> Incæte Itota Codito ængä beyænque abæ tawænte gote bai quëwëmö iñömonte Wængongui önonque änämaï inte waadete pönö badongä ate mönö tömengä ayongä nö cæmö bamompä. <sup>25</sup> Wængongui iñömö Itota Codito ingante da pönöninque, Tömengä mïnitö wënæ wënæ cædü ante teëmente wængä beyænque botö wæætë piyænë cædinque mïnitö imïnite pänämaï incæboimpä, ante cægacäimpä. Ìninqe tömengä, Mänömaï pönö cæbo ate mïnitö, Itota wepæ mönö beyæ pe tæ pe tæ wæænimpä, ante wede pönëninque wede mïni pönönö beyænque quëwencæmïnimpä, ante pönö cægacäimpä.

Mänömaï cædinque Wængongui wëenëñedë mönö waocabo mönö wënæ wënæ cægainö ante ee adinque në pänämaï ingaingä incæte edæ, Botö

cōwē nōingā ante apænte änōmo ïmopa, ante ēñencæmīnīmpa, ante odōmongacāīmpa. <sup>26</sup> Ìnīnque, Wængonguī nē nō cæcā ïnongā ingampa, ante mōnō acæīmpa. Ayæ adobai, Itota ingante nē pōnēmō ïñōmonte Wængonguī nē panguēnengā ingā incæ mōnō ïmonte ata cæpodīnque pōnō badongā ate mōnō wæætē tōmengā ayongā edæ nē nō cæmō bamompa, ante mōnō acæīmpa. Ìnīnque tōmengā mănōmaī cædīnque tōmengā nō nānō cædō ante odōmoncæte ante ñōwo cægacāīmpa.

<sup>27</sup> Ìnīnque mōnō waocabo ïñōmō nāmā ængō cæte bai cædīnque mōnō, Nāmā cædīnque nō cæmō bamompa, ante ædō cæte anguīmōō. Ìñæmpa mănōmaī ānīnque cædāmaī ingæīmpa. Quīnante nāmā wīī ængō cæquīī, ante wæmīnitawo. Mōitee wodi nānō wææ angainō ædæmō ēñente cæmō inte bai mōnō, Tōmēmō cætamompa, ancædōmōīmpa. Incæte ædæmō ēñente dicæ cæmongaa. Wæætē tōmengā ingante wede mōnō pōnēnō beyænque tōmengā ayongā nō cædōmō bamompa, ante adīnque mōnō, Tōmēmō cætamompa, ante ædō cæte anguīī. <sup>28</sup> Ìñæmpa waocā Wængonguī nānō wææ angainō ante ēñente cæcā incæ wīī tōmengā nānō ēñente cædō beyæ nē nō cæcā bacampa. Wæætē wede nānō pōnēnō beyænque Wængonguī ayongā edæ nē nō cæcā bacampa, ante do edæ apænebo ēñēmaīmīnīpa.

<sup>29</sup> Oodeomōni ïñōmōnite Wængonguī mōnitō Wængonguī ïnongā ingampa. Oodeomīni ïnāmaī ïmīni guīquēnē, Wīī mōnitō Wængonguī ingampa, ante pōnēmīnitawo. Ìñæmpa oodeomīni ïnāmaī ïñōmīnite adocā Wængonguī mīnitō Wængonguī

ingampa. <sup>30</sup> Edæ adocanque Wængonguï inongä ingampa. Ìinque në eö togæimöni ìmöni möni wede pönënö beyænque tömengä pönö badongä ate tömengä ayongä edæ nö cæmöni bamönipa. Adobaï bagäamini mini wede pönënö beyænque Wængonguï adocanque inongä inte pönö badongä ate mïnitö adobaï tömengä ayongä nö cæmïni bamïnipa. <sup>31</sup> Mönö pönënö beyænque impa, ante apænedinque mönitö Wængonguï nänö wææ angainö ante dicæ wëä godonte bai cæmöniyaa. Wïi mänömaï cæmönipa. Wæætë mänömainö ante apænedinque tömengä nänö wææ angainö ante Ao äinique mönitö, Ëñeedäni, ante odömonte apænemönipa.

## 4

### *Abadäo wodi æbänö cægacäi, ante pönengcæimpa*

<sup>1</sup> Mäninö ante mönitö mæmæ Abadäo wodi ïñömö æbänö ante ëñengacäi, ante mönö ñowo pönente apænecæimpa. <sup>2</sup> Abadäo wodi në ëñente cæcä ingaingä incæte tömengä nänö ëñente cædö beyænque dicæ nö pönï entawengä bacantawogaa. Mänömaï cædinque nö cæcä bagacäimpa, ante näwangä i bai tömengä woadäni ëñëñönänite, Waa cæbo imopa, ante do ancægacäimpa. Incæte tömengä Wængonguï ëñëñongante mäninö ante cöwë änämaï inguënengä ingacäimpa. <sup>3</sup> Wængonguï æbänö ante apænecä ëñente yewæmongadäni, ante amïni. Edæ iïmaï ante apænecä ëñente yewæmongadänimpa. “Wængonguï nöingä ante apænecampa, ante Abadäo wede pönengacäimpa. Ìinque tömengä

wede nänö pönönö beyænque Wængonguï wæætë edæ, Botö ayömo Abadäo nē nō entawengä ingä abopa, angacäimpa,” ante yewæmongadänimpa.

<sup>4</sup> Edæ wadäni beyæ waocä nanguï cæcä ate tömënäni debe badinäni inte edæ, Önonque pönömöni æe, ante ædö cæte anguinäni. Ìñæmpa wii önonque godonte impa. Wæætë tömengä nänö nanguï cædinö beyænque paga ante nē godonguënänäni inte awënëidi, Bitö nanguï cæbitapa, ante godönäni ængampa. <sup>5</sup> Wængonguï guiquënë önonque pönö cæcä æmöimpa. Waocä wiwa cæcä incæ wede pönengä adinque Wængonguï pönö badongä ate tömengä Wængonguï ayongante wæætë nō cæcä bacampa. Ìninqe waocä waa cädämaï incæ edæ wede pönengä adinque Wængonguï wæætë tömengä ingante pönö badöninque, Nö pönï bitö entawenguinque bitö wede pönëmi abopa, angampa. <sup>6</sup> Waocä waa cädämaï ìñongante Wængonguï pönö badongä ate tömengä Wængonguï ayongä nō pönï entawengä ìninqe tömengä watapæ quëwencæcäimpa, ante apænedinque Dabii wodi adobaï ämotamini ante bai yewæmongacäimpa.

<sup>7</sup> Adocä yewæmöninque,

“Wadäni ëñänämaï cädäni inänite Wængonguï pönö ñimpo cæcä ate

tömënäni wæætë watapæ quëwencädänimpa.

Edæ tömënäni ëñänämaï nänï cädö ante ö ænte mao tee moncate bai cæcä adinque nanguï tocädänimpa.

<sup>8</sup> Ecänö ingante Wængonguï, Bitö pante wæquinque wënæ wënæ cæbipa, ante cöwë püinte änämaï

ingä ïninqe mäningä waocä wæætē nangui  
tocæcäimpa.”

<sup>9</sup> Ante Awënë Dabii wodi, Eö togæninänique  
tocædänimpa, ante dicæ yewæmongantawogaa.  
Bagäadäni adobaï tocædänimpa, ante ancæte ante  
yewæmongacäimpa. Abadäo wodi Wængongui  
ingante wede nänö pönönö beyænque Wængongui,  
Botö ayömo Abadäo nē nō entawengä ingä  
abopa, angacäimpa. Mänömainö ante edæ botö  
do yewæmömo abaiminipa. <sup>10</sup> Abadäo wodi æbänö  
engæñongante Wængongui mänömaï angacäi.  
Dicæ eö togæningä ïñongante angantawogaa.  
Wæætē bagäacä ïñongante angacäimpa. <sup>11</sup> ïninqe,  
Abadäo bagäacä inte wede pönengä beyænque  
botö pönö badömo ate nō cæcä bacampa, ante  
ëñencædänimpa, ante cædinque Wængongui angä  
eö togænte bagacäimpa.

Mänömaï cæcä beyæ minitö bagäamini inte  
wede pönemini ïñömini Abadäo wodi minitö  
wæmængä bai bagacäimpa. Abadäo wodi pæimini  
bai wede pönemini adinque Wængongui adobaï,  
Nö entawemini bamini acæboimpa, ante pönö  
badongacäimpa. <sup>12</sup> Mönitö wæmæ Abadäo  
wodi doyedē bagäacä ingäñedē incæ wede  
pönengä ingacäimpa. Möni idægocabo ïñömö nē eö  
togæimöni inte edæ tömengä wede pönente nänö  
cægongainö adodö tee empote gomönipa. ïninqe  
mäninönö möni wede pönente godönö gomöni  
beyænque möni eö togæncabo wæmængä adocä  
Abadäo wodi ingacäimpa.

*Mönö wede pönönö beyænque Wængongui nänö  
angainö ante cæcampa, ante*

<sup>13</sup> Wængonguï, Inguipoga incæ bitö nē ænguïmi incæbiimpa, äninque Abadäo wodi tönö tömengä nänömoidi inänite pönö angä ængadänimpa. Mänömainö äninque Wængonguï dicæ, Botö wææ angainö ante eñente cädänique æncädänimpa, ante angantawogaa. Wæætē edæ wede pönente tömengä ayongä nö entawänäni badäni beyænque Wængonguï, Inguipoga incæ pönömo æncæminimpa, ante apænegacäimpa. <sup>14</sup> Wængonguï dicæ, Botö wææ angainö eñente nē cädänique nē ænguïnäni inänipa, ante angantawogaa. Edæ mänömainö angä bai mönö wede pönönö ante önonque pönencädömöimpa. Tömengä nänö angainö incæ wo ewente bai bacädönimpa. <sup>15</sup> Edæ mäninö tömengä nänö wææ angainö ante eñenämaï cädäni beyænque Wængonguï ænguï badinque pangampa. Wæætē wææ änämaï inte bai Wængonguï, Botö wææ angainö ante eñenämaï cæbipa, ante ædö cæte anguingää. Edæ dæ ancädönimpa.

<sup>16</sup> Mänömaï beyæ Wængonguï, Botö waadete pönö cädö beyænque æminipa, ante edonque acäimpa, ante cædinque Abadäo wodi wede nänö pönönö beyænque ante, Pönömo æncæminimpa, angacäimpa. Mönitö Möitee wodi nänö wææ angainö ante nē eñēmöni iñömönite wii adomönique imönite angacäimpa. Wæætē Abadäo wodi nänö wede pönengai bai adobai wede pönömö iñömönte mönö tömämö imonte Wængonguï, Cöwē pönömo æncæminimpa, angacäimpa. Edæ mönö wede pönencabo iñömönte Abadäo wodi tömämö wæmængä bai ingacäimpa. <sup>17</sup> Wængonguï edæ do wængainäni inänite pönö

cæcä ate tömënäni iñömö ñäni ömæmonte edæ miinäni quëwënanipa. Dæ angaincoo incæ tömengä do badongä ate edæ a ongoncoopa. Wængonguï mänömaï nê badongä iñongante Abadäo wodi tömengä ingante nê wede pönengä ingacäimpa. Ìninqe Wængonguï, “Abadäo ëñëmi. Botö pönö badömo ate bitö pæinäni yebæninque wacabodäni näni cabo wacabodäni näni cabo nanguï inäni iñönänite edæ bitö adobique tömënäni wæmæmi incæbiimpa.” Ante Wængonguï beyæ ante yewæmongatimpa. Ìninqe Wængonguï ayongante mönö wede pönëmö iñömonte Abadäo wodi mönö wæmængä bagacäimpa.

18 Tömengä ingante, “Bitö pæinäni edæ mänimpodäni bacædänimpa,” ante Wængonguï do angacäimpa. Mänömainö angä ëñëninque, Ædö cæte baquïi, ante wædongä incæ Abadäo wodi, Wængonguï cöwë cæcä beyæ watapæ bacäimpa, ante wede pönengä ingacäimpa. Ìninqe tömengä wede nänö pönënö beyænque “wacabodäni näni cabo wacabodäni näni cabo nanguï inäni bayönänite tömënäni wæmængä” Abadäo bagacäimpa.

19 Tömengä, Botö picængadebo wodo tiëë wadepo quëwengaimo inte edæ botö baö wænte bai ëñabo inte edæ ædö cæte wëñæ tapæiquimoo, ante ëñengacäimpa. Ayæ, Tada adobai wëñæ cöwë mänämaï ingaingä inte picængadecä badinque ædö cæte wëñæ manguingää, ante pönengacäimpa. Incæte mäninö nänö wædö beyænque guñëñadämaï inte Abadäo wodi Wængonguï nänö äninö ante godömenque

pönengacäimpa. <sup>20</sup> Tömengä, Wængonguï wabänö cæbaingää, ante wædämaï inte wæætë Wængonguï nänö, Cöwë pönö cæcæboimpa, äninö ante wede pönengacäimpa. Ayæ, Wængonguï bitö ñäö entawëmi inte tæi ëmonte waa cæcæbiimpa, ante godömenque tæi piñænte entawëninque Abadäö wodi wede pönengacäimpa. <sup>21</sup> Edæ, Wængonguï në tæi piñængä inte, Cöwë cæcæboimpa, ante në angaingä inte edæ cöwë cæcæcäimpa, ante Abadäö do ëñëninque edæ wede pönengacäimpa. <sup>22</sup> Tömengä mänömaï wede pönengä beyænque Wængonguï, Abadäö bitö nö entawëmi ïmi abopa, angacäimpa.

<sup>23</sup> Mänine, Bitö nö cæbi ïmi abopa, ante nänö angaine iñömö wii tömengä beyænque yewæmongatimpa. <sup>24</sup> Wæætë mönö beyæ adobaï yewæmongatimpa. Edæ, Mönö Awënë Itota ingante Wængonguï angä ñäni ömæmongacäimpa, ante në angaingä ingante wede pönëmö iñömonte Wængonguï, Botö ayömo minitö nö cæmïni ïmïni abopa, ante badongampa. <sup>25</sup> Wënæ wënæ mönö cädö beyænque mönö Awënë Itota ingante Wængonguï pædæ godongä wængacäimpa. Ayæ mönö beyæ ante cædinque tömengä mönö Awënë Itota ingante, Bitö në nö cädömi inte ñäni ömæmömi beyænque tömënäni botö ayömo nö entawënäni bacædänimpa, ante cædinque angä ñäni ömæmongacäimpa.

## 5

*Wængonguï badongä ate mönö nö cæmö bamompa*



1 Mönö wede pönönö beyænque Wængongui pönö badongä ate mönö tömengä ayongante edæ nö cæmö bamompa. İninqe mönö Awënë Itota Codito nänö cægainö beyænque Wængongui piyænë cæcä ate mönö tömengä tönö godongämæ gänë entawente quëwëmompa. <sup>2</sup> Mönö wede pönönö beyæ adocä Codito mönö imonte pönö ænte mämongä ate Wængongui waadete pönö cædinque mönö imonte ængampa. Ayæ Wængongui në ñäö ëmongä weca ongöñömö tömengä pönö badongä ate mönö godongämæ ñäö ëmonte mönö watapæ bacæimpa, ante wede pönëninque tomompa.

<sup>3</sup> Ayæ wii mäninque beyæ tomompa. İñæmpa, Waocä nänö wæntædämaï inte ee cæquinque caate wæcampa, ante ëñëmö ininqe mönö caate wæmö incæte caate mönö wædö beyæ adobaï tomompa. <sup>4</sup> Ayæ në wæntædämaï inte ee cæmö adinque mönö Wængongui ayongä në waa cæmö edæ bamompa. Mänömaï bamö ininqe mönö, Watapæ bacæimpa, ante pönente tomompa. <sup>5</sup> Mänömainö ante në pönente tomö iñömö edæ mönö ænguënönö ante do æninque mönö guingo imonte wædämaï imompa. Edæ Wængongui tömengä Tæiyæ Waëmö Önöwoca ingante da pönöninque tömengä nänö waadete pönönö adobaï do pönongä æninque mimönë entawëmompa.

<sup>6</sup> Edæ iïmaï impa. Mönö aquüimö pönï inömo inte, Ædö cæte cæmöö, ante wæyömonte mönö Codito iñömö eyepæ pönï pöninque, Minitö Wængongui ayongante wiwa cæmïni imïnipa, ante adinque wiwa mönö cædö ante teëmente wæætë wængacäimpa. <sup>7</sup> Waocä guiquënë wacä në nö

cædongä ingä adinque tömengä beyæ wæætë dicæ wænguingäa. Incæte, Në waa cædongä wæætë quëwencæcäimpa, ante cædinque adocanque adocanque wabänö Ao ante tömengä beyæ wæætë wæmäinänipa. <sup>8</sup> Incæte, Wængongui mīnitō imīnite nangui waadete pönengampa, ante odömoncæte ante cædinque mönō Codito iñömō në wënæ wënæ cæmō iñömōnte mönō beyænque wæætë wængacäimpa. <sup>9</sup> Codito wepæ mönō beyæ pe tæ pe tæ wææ beyænque mönō Wængongui ayongante nö entawëmō do batamompa. Codito mönō beyæ mänömai wængaingä inte cōwë godömenque cæcæcäimpa.

Ämo ëñëedäni. Wængongui në piinte panguënegä iñongante adocä Codito gä pe æmpote ængä beyænque Wængongui wæætë mönō imonte edæ ata cæpocä quëwencæmōimpa. <sup>10</sup> Mönō edæ Wængongui tönō mönō godongämæ piincabo iñömōnte tömengä Wengä mönō beyæ wæætë wængä beyænque mönō Wængongui tönō godongämæ piyænë cæmō bagamōimpa. Mönō Wængongui tönō godongämæ piyænë cæmō inique tömengä Wengä iñömō cōwë godömenque cæcæcäimpa. Ämo ëñëedäni. Tömengä adocä do wængaingä inte ñäni ömæmonte müingä quëwëninque mönō imonte ængä beyænque mönō wænämai inte cōwë quëwencæmōimpa. <sup>11</sup> Ayæ mönō godömenque iimainö ante ëñengæimpa. Mönō Awënë Itota Codito ængä beyænque Wængongui piyænë cæcä inique mönō ñöwo Wængongui nempo quëwëninque edæ Itota Codito beyæ ante watapæ tomompa.

*Tānocā Adāo wodi bai Codito adobai Tānocā ingampa*

<sup>12</sup> Docā mæmæ adocanque tānocā incæ ēñēnāmaī cæcā inique mōnō wēnæ wēnæ cæpāmo inguipoga do pongatimpa. Ayæ tōmengā nānō ēñēnāmaī cægainō beyænque nē wæwocacā bagacāimpa. Tōmengā wēnæ wēnæ cæcā ingaingā bai mōnō tōmāmō adobai nē wēnæ wēnæ cæmō imō inique edæ mōnō waocabo tōmāmō nē wæwocamō edæ do bagamōimpa. <sup>13</sup> Edæ wēēnēñedē Mōitee wodi nānō wææ ānāmaī iñedē incæ waodāni do wēnæ wēnæ cædāni ingadānimpa. Wēnæ wēnæ cædāni incæte Wængonguī, Botō wææ ānō ante ēñēnāmaī cæminipa, ante ædō cæte apænte anguingā. Iñæmpa māniñedē ayæ wææ ānāmaī ingacāimpa. <sup>14</sup> Nē Ponguingā, ante dodāni nāni nē angaingā iñōmō Tānocā nānō ingai bai docā Adāo wodi adobai tānocā ingacāimpa. Incæte Adāo wodi Wængonguī nānō wææ ānō ante ēñēnāmaī cædinque wēnæ wēnæ cægacāimpa. Wæætē Wængonguī edæ Mōitee wodi nānō quēwenganca wææ ānāmaī iñongante Adāo wodi pæināni guiquēnē wēnæ wēnæ cædāni incæte tōmengā nānō ēñēnāmaī cægai bai wīi adobai ēñēnāmaī cægadānimpa. Incæte tōmēnāni nē wæwocadāni inte wægadānimpa.

<sup>15</sup> Incæte Wængonguī nānō wææ angainō ante adocanque nānō ēñēnāmaī cægai bai Wængonguī nānō pōnongai iñōmō wīi adobai impa. Edæ adocanque nānō ēñēnāmaī cægai beyænque nangui ināni inte wægadānimpa. Incæte Wængonguī guiquēnē nangui pōni waadete

pönö cædinque Itota Codito ingante da pönongä pöninge tömengä adocanque inongä waadete eyepæ pöni pönö cæcä ate mönö nangui pöni imö inte quëwëmompa. <sup>16</sup> Onguiñængä adocanque wënæ wënæ nänö cægai beyæ nē wæwocadäni bagadänimpa. Wængongui nänö pönongai iñömö edæ wii adobai impa. Adocanque nänö adopoque eññämaï cægainö ante adinque Wængongui tömengä ingante apænte äninque edæ, Bitö tente wæquinque impa, angacäimpa. Wæætē Wængongui nänö wææ angainö ante eññämaï wæætē wæætē cæmö incæte tömengä, Botö ayömo mīni nō entawenguinque impa, ante önonque pönongä ænte entawëmompa.

<sup>17</sup> Waocä adocanque incæ Wængongui nänö wææ angainö ante eññämaï cæcä ininque tömengä adocanque nänö eññämaï cægai beyænque mönö wæwocamö do bagamöimpa. Wængongui guiquënë godömenque eyepæ pöni waadete pönö badongä ate tömengä ayongä mönö nō entawëmö bagamöimpa. Ininque Itota Codito adobai Adocanque iñongante mönö tömengä nempo wæwocadämaï inte quëwëninque awënëidi bai badinque quëwëmompa.

<sup>18</sup> Mänömaï beyæ adocanque adopoque eññämaï cæcä beyænque Wængongui mönö tömämö imonte apænte äninque, Mīni wænguinquē wënæ wënæ cæmīnīpa, angampa. Ayæ adobai Adocanque adopoque nänö nō cægainö beyænque mönö Wængongui ayongä nō cæmö bamö ininque Wængongui apænte äninque mönö tömämö imonte, Mīni quëwenguinquē mīnitö botö ayömo nō entawëmīni bamīnīpa, angampa. <sup>19</sup> Edæ

adocanque nänö adopoque eññämaï cægai beyænque mönö nanguï imö incæ edæ nē wënæ wënæ cæmö bagamöimpa. Adobai Adocanque nänö adopoque eññente cægai beyænque mönö nanguï imö incæ edæ Wængongui ayongä nö cæmö bagamöimpa.

<sup>20</sup> Mönö waocabo wënæ wënæ cæyömonte Wængongui, Botö wææ änö eññämaï inte cæminipa, ante edonque acæminipa, ante wææ angacäimpa. Wææ angä ate edonque adinque mönö waocabo wæætë, Nanguï eññämaï inte cæte awædö, ante wæyömonte Adocä incæ godömenque nanguï waadete pönö cæcä æmompä.

<sup>21</sup> Ìninqe mönö eññämaï cægai beyæ mönö nē wæwocamö bagamöimpa. Wæætë mönö Awënë Itota Codito waadete pönö nö cæte badongä ate mönö cöwë wänämaï quëwënguinque Wængongui ayongä nö entawëmö bagamöimpa.

## 6

*Codito nempo quëwëninque mönö nē wïwa cædongä nempo wï quëwëmompä*

<sup>1</sup> Ìninqe mönö æbänö anguii. Pancadäniya iïmaï änewënanipa. Wængongui godömenque waadete pönö cæcæcäimpa, ante cædinque mönö godömenque wënæ wënæ cæcæimpa, ante tedewënanipa. Mönö iñömö dicæ mänömainö ante tedewenguënëmö imongaa. <sup>2</sup> Ìñæmpä ædö cæte mänömainö ante tedewenguii. Wënæ wënæ mönö cæte quëwëmämo pædæ godömo æninqe Codito teëmë mongæninqe wæñongante mönö tömengä tönö godongämæ wænte bai inömo inte ædö cæte

godömenque wënæ wënæ cæte quëwenguüi. <sup>3</sup> Mönö Itota Codito nempo quëwengæïmpa, ante æpænë guïdinqe mönö tömengä tönö godongämæ wængaïmö bai batamompa, ante mïnitö iñömö ëñënämaï imïnitawo. <sup>4</sup> Tömengä wænte öñöñongante Mæmpo Wængonguï në ñäö entawënogä inte tæi ëmönongä inte, Ñäni ömæmöe, angä ñäni ömæmongacäïmpa. Ìninqe mönö iñömö edæ, Codito tönö ñäni ömæmonte bai mönö müimö quëwengæïmpa, ante cædinqe æpænë guïdinqe tömengä wodido godongämæ guïite bai wænte bai öñöntamompa.

<sup>5</sup> Edæ tömengä wængä ate godongämæ wænte bai bagaïmö Ìninqe mönö tömengä ñäni ömæmongä ate tömengä tönö ääwocaque bai ëwocate ñäni ömæmonte bai quëwëmaïmompä.

<sup>6</sup> Waocä nänö në ö æninäni inte tömengä beyænque cæte në quëwënäni bai mönö adobai wënæ wënæ mönö cædö beyænque wægämöïmpa. Mänömaï inte wæyömonte mönö Codito iñömö, Aamö cæte gocæminïmpa, ante cædinqe wënæ wënæ cæte mönö wentamö mongæñö ö ænte teëmë mongængantapa. Ee mongæñongante tömengä ingante awäa timpodäni wængä adinqe baonque ante mönö wënæ wënæ cæpämö iñömö ëwente bai ba Ìninqe mönö do aamö cæte bai mäninö ante ëmö cæte gomompa. <sup>7</sup> Waocä æmæwo wængaingä inte edæ ædö cæte wënæ wënæ cæquingä. Edæ tömengä nänö wënæ wënæ cægainö ante ëmö cæte aamö cæte bai gogaingä ingampa.

<sup>8</sup> Mönö Codito tönö ääwocaque bai ëwocadinqe adopoque wængaïmö inte mönö tömengä tönö godongämæ quëwengæïmpa, ante wede

pönēmompā. <sup>9</sup> Edæ do wænte ñāni ömæmonte mīngā quēwēnongā inte Codito wæætē mēmpoga wænguingā ināmaī ingāmpā. Tömengā ñōwo wæwocādāmaī iñongante tömengā ingante, Wæmäwe, ante ædö cæte anguii. Iñæmpā, wænāmaī incæcäimpā, ante do ēñēmompā. <sup>10</sup> Tömengā adopoque wæninque mönō wēnæ wēnæ cægāinō ante æmæwo wido cæcæte ante teēmē mongænte wængacäimpā. Wæætē ñāni ömæmonte mīngā quēwēninque tömengā, Wængongui beyænque cæte quēwencæboimpā, ante quēwengāmpā. <sup>11</sup> Minitö adobaī Codito nempo quēwēnömīni inte wīwa mīni cægāinō ante æmæwo wido cæcæte ante cædinque, Itota Codito tönō adopoque wængāimō imompā, ante wæætē, Mönō Wængongui beyænque cæte quēwengæimpā, ante pönēninque quēwēedāni.

<sup>12</sup> Mänōmaī beyæ mīnitö, Baonga mönō ñömænguiñō quēwēninque mönō wēnæ wēnæ cæinēnō ante mönō ēñente cædāmaī ingæimpā, ante nāmā wææ aadinque edæ wēnæ wēnæ mīni cæinēwēnō ante edæ ēñēnāmaī inte quēwēedāni. <sup>13</sup> Ayæ mīnitö, Bado, ante edæ, Botö baonca wīwa cæcæimpā, ante edæ mīnitö baö quīomē i incæ wēnæ wēnæ cæquinque ante edæ godö cædāmaī iedāni. Wæætē do wæwocagāimīni inte ñāni ömæmonte mīimīni quēwēninque mīnitö wæætē Wængongui ingante nāmā godömīni æncæcäimpā. Edæ, Botö baö ini edæ tömäo Wængongui qui impā, ante pædæ godōninque mīimīni quēwēñōmīnite tömengā wæætē mīnitö tönō godongāmæ cædinque nō pōni cæcæcäimpā. <sup>14</sup> Edæ Möitee wodi nānō

wææ angainö ante eñemini incæte wii mäninö beyænque quëwëminipa. Wæætë Wængongui waadete pönö cæcä beyænque quëwëmini inte minitö wënæ wënæ mini cæinëwënö ante eñente cädämai inte quëwencëminipa.

*Wiwa mönö cæinëwënö ante mönö eñënämai ingëimpa*

<sup>15</sup> Möitee wodi nänö wææ angainö ante eñente beyænque wii quëwëmö inte mönö Wængongui waadete pönö cæcä beyænque quëwëmompä. Näwangä impä. İninqe mönö æbänö cæquii. Wädäni iñömö idiquibæ ante pönëninque, Wængongui pönö cæcä beyænque në quëwënömö inte mönö wæætë wënæ wënæ cæcëimpa, ante tedewënanipa. Mönö iñömö ædö cæte mänömainö ante cæquimö.

<sup>16</sup> Wacä ingante në cæte quëwëmini bacæte ante cædinque minitö, Bado, bitö botö awënë badinque edæ ämi eñente në cæbo baboe, ämini ininque edæ mäningä minitö iminite ö ængä ate tömengä beyænque cæte quëwëmaimnipä. Mäninö ante pönëminiyaa. Ayæ adobaï minitö wënæ wënæ cæinente mini wädö ante Ao ante cæmini ininque mini wænguinque edæ mäninö beyænque cæte në quëwëmini inte wëbaimnipä. Wæætë Wængongui ingante, Bado, bitö botö Awënë inömi inte edæ ämi eñente në cæbo baboe, äninque minitö nö cæte mini quëwëginque tömengä beyænque në cæmini babaïminipa. <sup>17</sup> Minitö doyedë mini wënæ wënæ cæinëwënonque ante cædinque minitö awënë beyænque cæte në quëwëmini bai ingaminipa. Nöwo guiquënë Wængongui nö nänö änö ante odömömöni eñëninque minitö iinonque



ante edæ nē ēñente cæmīni bamīnitapa. Mänōmaī bamīnīpa, ante adīnque botō Wængonguī ingante waa ate pōnēnīnque apænebopa. <sup>18</sup> Ayæ wēnæ wēnæ mīni cædō beyænque cæte nē quēwēmīni inte wæyōmīnite Wængonguī ñīmpo cæcā ate mīnitō abæ tawænte ee gote baī quēwēmīnīpa. Ñōwo wæætē tōmengä nänō nō cædonque ante ēñente cæmīni īnīnque mīnitō edæ nē nō cædongä nempo quēwēnīnque tōmengä beyænque cæte nē quēwēmīni bamīnīpa.

<sup>19</sup> Mīnitō önōmīnīque inte æīquedō ædæmō ēñenguīmīnīi, ante wædīnque botō, Waocā nänō cæī baī impa, ante tededīnque odōmōmo aedāni. Wēēñēñedē wēnæ wēnæ cædīnque godōmenque quīngāmē baī quēwēncæte ante mīnitō, Bado, ante quīomē incæ mīni baonga wīwa cæquīnque pædæ godō cæmīnitapa. Mänōmaī beyænque ēñēnāmaī mīni cæīñewēnō ante ēñente cædīnque edæ mīnitō māñīnonque ante nē cæte quēwēmīni īngamīnīmpa. Ñōwo guīquēnē tæiyæ waēmō mīni ēwocate quēwēngūnīque ante mīnitō baō īnī edæ, Wængonguī quī impa, ante tōmāo pædæ godōedāni. Ayæ mīni nō cæquīnque ante edæ tōmengä beyænque nē cæmīni inte quēwēedāni. <sup>20</sup> Wēēñēñedē īñōmō mīnitō wēnæ wēnæ mīni cæīñēnō beyænque cæte nē quēwēmīni baī inte wægāmīnīmpa. Māñīñedē mīnitō nē nō cædongä nempo quēwēnāmaī īngāmīnī inte tōmengä nänō angāīnō ante edæ ēñēnāmaī īngamīnīmpa. <sup>21</sup> Māñīñedē quīngāmē baī mīni cægāīnō ante pōnente wædīnque mīnitō ñōwo īñōmō guīngo īmonte bamīnīpa. Edæ māñīnō mīni wīwa cægāīnō

beyæ ante dicæ watapæ tote bamīniyaa. Īñæmpa edæ mīni wænguinque mǎnōmaī cægaminimpa.

<sup>22</sup> Ñōwo guiquēnē, Wēnæ wēnæ mīni cæinēwēnō ante idæwaa ēñencæminimpa, ante cædinque Wængonguī gǎ pe æmpote ængǎ ate mīnitō abæ tawænte baī Wængonguī nempo wæætē ee pongaminimpa. Īninqe nē gǎ pe æmpocǎ nempo quēwēninqe mīnitō tōmengǎ ingante cæte nē quēwēmīni inte mīni cōwē wænāmaī quēwenguinque tæiyæ waēmō ēwocamīni bamīnipa.

<sup>23</sup> Mōnō waocabo mōnō wēnæ wēnæ cædō beyæ ante paga cæte baī cædinque Wængonguī mōnō imonte pōnō pangǎ wænguēnēmō imōmpa. Wæætē, Wantæpiyæ quēwencæminimpa, ante adocǎ incæ mōnō Awēnē Itota Codito tōnō godongāmæ cædinque mōnō imonte ōnonque pōnō ængǎ beyænque mōnō cōwē wænāmaī quēwēmōmpa.

## 7

*Ēñente cæquēnēmō inte ñā cæyænte baī ingamōimpa*

<sup>1</sup> Īñānāni ēñēedāni. Mōitee wodi nānō wææ ante yewæmongainō ante do adīmīni imīni incæte mīnitō iīmaī ante ēñēmīniyaa. Edæ, Ēñente cæedāni, ante tōmengǎ mīināni quēwēnānique inānite wææ ante yewæmongacāimpa. Īninqe waocǎ do wæningǎ iñongante, Cæe, añōmō tōmengǎ mīingǎ ingampa diyæ cæquingǎā. Edæ dobæ wængāimpa.

<sup>2</sup> Īīmaīnō ante pōnēedāni. Onquiyængǎ ingante ñānōnāni mongǎ ate tōmengǎ nānōogængǎ mīingǎ nānō quēwenganca onquiyængǎ iñōmō tōmengǎ nānōogængǎ ingante ēñente quēwencæcāimpa,

ante wææ ante yewæmongatimpa. Wæætë edæ tömengä nänöogængä wængä ate onquiyængä owæmpoingä inte adocanque quëwëñongante mänömainö ante edæ ædö cæte wææ anguii.

<sup>3</sup> Ìninqe nänöogængä ayæ mïingä quëwëñongante onquiyængä wacä ingante godö guëa mongä adinque, Bitö nänöogængä mïingä iñongante bitö wacä ingante guëa godö mömipa töö, ante piinänipa. Incæte tömengä nänöogængä wængä ate abæ tawænte gote bai tömengä adocanque quëwëñongante, Wacä ingante mönämai incæbiimpa, ante ædö cæte wææ anguinäni. Do owæmpodingä inte wacä ingante mongä adinque tänocä quëwengampa diyæ wææ anguinäni. Edæ owæmpodingä inte tömengä do mongampa.

<sup>4</sup> Mänömai beyæ botö tönïñamini, Mönö adobai imompa, ante ämo ëñeedäni. Nänönäni në möningä iñömö ëñente cæquënegä ingä bai minitö wëenëñedë adobai Möitee wodi nänö wææ angainö ante ëñente cæquënemini inte ñä cæyænte bai ingamïnimpa. Mänömai inte wæyömïnite Codito iñömö, Minitö botö nempo quëwëninque waincate bai cæmïni badinque Wængongui beyænque ante ëñente cæcæmïnimpa, ante pönö cægacäimpa. Tömengä baonga ponte ëñadinque mönö beyæ wëninque ñäni ömæmongacäimpa. Ìninqe mönö tömengä tönö adobai wænte bai ingaimö inte mönö wëenëñedë mönö ëñenguënegainö ante edæ ædö cæte wæætë ëñenguënemö inguimöö. Wæætë edæ në ñäni ömæmongaingä nempo quëwënömo inte mönö tömengä quimö inömö imompa.

<sup>5</sup> Doyedë iñömö mönö në wæwocamö inömö inte

baonque ante pönente mönō quēwēñedē Möitee wodi nänō wææ angainō ante ēñente wædinque godömenque wīwa cæinēwente wæmō batamompa. Ìninqe mönō baaca incate bai cædinque mönō wænguinque wënæ wënæ cætamompa. <sup>6</sup> Wēenēñedē wææ änāni ate mönō, Ædō cæte ēñente cæquīi, ante ñā cæyænte bai wægaimō inte mönō edæ Codito tönō adopoque wænte bai ñī cæyænte bai bagamöimpa. Ñöwo guiquēnē adopoque wægaimō inte mönō Möitee wodi pedæne ante nänō wææ ante yewæmongainō ante wīi ēñente cæquēnēmō inte abæ tawænte bai gomompa. Wæætē edæ Wængongui Tæiyæ Waemō Önöwoca beyæ quēwēmō inömō inte mönō tömengä mīine nänō änonque ante ēñente cæmō imompa.

*Wënæ wënæ botō cædō beyæ ante wæbopa, ante*

<sup>7</sup> Ìninqe æbänō ante anguimoo. Möitee wodi, Wënæ wënæ cæqui, ante yewæmongacäimpa, ante botō dicæ antawogaa. Ædō cæte edæ mänömaï anguīi. Ìñæmpa tömengä wææ änāmaï ingä bai botō, Quinō wënæ wënæ cæte i, ante ēñenāmaï incædömoimpa. Botō edæ, Wacä qui æinente wæbo incæte botō ænāmaï inte ee abo inte waa cæbopa, ante pönengaboimpa. Möitee wæætē, “Wacä qui ante æinente wædāmaï ie,” ante wææ angä beyænque botō, Æ æinente botō wædō incæ wënæ wënæ impa, ante tæcæ ēñentabopa. Mäninō ante änāmaï ingä bai botō, Wënæ wënæ impa, ante ēñenāmaï incædömoimpa. <sup>8</sup> Ìninqe nē wënæ wënæ cædömo inte botō Möitee nänō wææ angainō ante önömoncaque ēñente ate botō quingämē bai tömancoo ante godömenque æinente wætabopa. Edæ

tömengä wææ änāmaï ingä bai mönō wënæ wënæ cædō iñömō edonque ināmaï inte edæ dæ ante bai incædōnimpa.

<sup>9</sup> Möitee wodi wææ ante nänō yewæmongainō ante botō adāmaï imoyedē botō ōnonque wædāmaï quēwengaboimpa. Wæætē, Īimaï wææ ante yewæmonte ongompa, ante adinque botō, Æ, wënæ wënæ cæbo imopa, ante tæcæ ēñēninque, <sup>10</sup> edæ nāñe wænte bai botō, Wæwocabo imopa, ante wætabopa. Edæ, Īimaï cædinque quēwencæminimpa, ante wææ ante nänō yewæmongainta adinque botō edæ, Botō wænguinque wīī ēñente cæbopa, ante tæcæ ēñēninque wætabopa. <sup>11</sup> Edæ Möitee wodi wææ ante nänō yewæmongainta do adīmo inte mǎnīnō ante ēñēnāmaï cædinque botō pante wænguinque wënæ wënæ cætabopa. Edæ, Ōnonque wënæ wënæ cæte tocæī, ante wapiticæ pōnente cæyōmote tömengä nänō wææ angainō ante odömönāni ēñēmo beyænque botō, Æ, botō wænguinque wënæ wënæ cæbopa, ante wægaboimpa.

<sup>12</sup> Wængonguī nänō wææ angainō iñömō tæiyæ waēmō inepa. Ayæ Möitee wodi adobaï mǎnīne tæiyæ waēmō inedō ante apænedinque, Īimaï cæedāni, ante wææ āninque, Mini waa cæte quēwenguinque ēñente cæcæminimpa, ante nōingä pōnī angacāimpa.

<sup>13</sup> Īinque tömengä, Mini waa quēwenguinque impa, ante nänō wææ angainō incæ botō imote ædō cæte wænonguīī. Wængonguī wæætē, Quīnō wënæ wënæ cæte ī, ante edonque acæminimpa, ante pōnō waa cædinque, Mīnitō ēñēnāmaï imīni

beyænque mīni wænguinque impa, ante wææ angacäimpa. Ìninqe Wængonguī nänö wææ angainö beyænque botö iñömö, Wënæ wënæ cægaboimpa, ante edonque atabopa.

<sup>14</sup> Mīnitö tæiyæ waëmö ewocacæminimpa, ante Wængonguī mönö önöwoca beyænque ante wææ angacäimpa, ante do eñëmompä. Incæte botö wiwa cædonö beyænque cæte nē quëwëmo inte botö edæ ömæwocate bai inte wæbopa. <sup>15</sup> Edæ botö waa cæinente wædö ante cædämaï inte botö wæætë edæ, Wīi cæinente awædö, ante botö piinte adö incæ edæ do cæte wæbopa. Ìninqe botö, Æbänö cæboo, ante eñënämaï imopa. <sup>16</sup> Wængonguī nänö wææ angainö ante eñënämaï cæbo incæte botö eñënämaï botö cædö ante wīi cæinëmopa. Mänömaï botö wīi cæinënö beyænque botö, Wængonguī waa cædinque wææ angacäimpa, ante bai cædinque tömengä nänö wææ angainö ante edæ Ao ante bai cæbopa. <sup>17</sup> Incæte botö wodi wīi tömëmo änö ante cæbopa. Wæætë edæ botö wiwa entawënö beyæ wīi cæinente botö wædö ante do eñente cædinque wæbopa. <sup>18</sup> Edæ ancaa waa cæinente wæbo incæte botö dicæ waa cæbogaa. Mänömaï beyæ botö, Botö baonga quëwëninque botö waa cæquinö iñömö edæ dæ ampa, ante do eñëmopa. <sup>19</sup> Waa pönī botö cæinënö incæ cædämaï inte wæbopa. Wæætë edæ wënæ wënæ cæte botö wīi cæinente wædö ante ancaa cæte wæbopa. <sup>20</sup> Ìninqe botö wīi cæinëmo inte do cæbo ininqe wīi tömëmo cæbopa. Wæætë wiwa cæquinque botö entawënö beyænque edæ wënæ wënæ cæte wæbopa.

<sup>21</sup> Waa cæinente wæbo incæte botö wënæ wënæ cæquinö edæ do entawente wæbopa. Ìninqe

botö ñä cæyænte bai ïmopa, ante do abopa.  
<sup>22</sup> Edæ botö Wængongui nänö wææ angainö ante  
 mimönë pönëningue watapæ tobopa. <sup>23</sup> Incæte,  
 Wængongui nänö wææ angainö ante botö pönënö  
 incæ eñënamai ingæimpa, ante botö edæ wade  
 wææ ante entawente bai inte wæbopa. Ìnque  
 nämä wææ ante bai mimönë botö pönënö tönö  
 wade, Eñënamai ingæimpa, ante wææ ante botö  
 entawënö tönö näëmæ guëadö guëa cæ bai inte  
 wæbopa. Edæ mänine beyæ wiwa botö cæquinö  
 entawëningue botö yæguincamenca ñä cæyænte bai  
 inte wæwëmopa.

<sup>24</sup> Edæ cætawente wængui wæ. Botö wiwa  
 cæquinö entawente beyæ botö wænguiñö  
 eñate wæyömote æcänö edæ æna beyænque  
 quëwëmaimoo, ante wæbopa. <sup>25</sup> Edæ, Itota  
 Codito beyænque quëwenguimo ïmopa, ante botö  
 Wængongui ingante waa ate pönente apænebopa.  
 Ìnque Wængongui nänö wææ angainö ante  
 eñëningue botö tömöno mimöno tömengä beyænque  
 cæte në quëwëmo ïnömo ïmopa. Incæte botö  
 eñayö beyæ botö wiwa cæinënö beyænque cæte  
 në quëwëmo inte wæbopa.

## 8

*Wængongui Önöwoca ingante ewocate  
 quëwengæimpa*

<sup>1</sup> Ìnque mönö Itota Codito nempo quëwëningue  
 mönö wiwa cæinente wæwënö ante cädämai  
 inömö inte wæætë tömengä Önöwoca pönö angä  
 eñëningue cæte quëwëmö adinque Wængongui  
 iñömo, Mini wænguingue, ante apænte änämai

ingampa. <sup>2</sup> Edæ wīwa cæinente mōnō wæwēnō ante mōnō wænguinque ēñente cæyōmonte Itota Codito iñōmō pōnō gā peyæmpote bai ò ængā beyænque mōnō abæ tawænte ee gote bai quēwēmōmpa. Ayæ tōmengā Ōnōwoca nē quēwēnongā nānō wææ änō ante wæætē mōnō ēñente cæinente quēwēmōmpa.

<sup>3</sup> Edæ Mōitee wodi, Īmaī cædāni, ante wææ añongā mōnō iñōmō wīwa cæinente mōnō wæwēnō beyænque aquīi piñænāmaī ēñadōmō inte, Mōnō ædō cæte ēñente cæquīi, ante wægāmōmpa. Mōnō waocabo mǎnōmaī wēnæ wēnæ cædōmō inte wæyōmō Wængonguī wæætē, Waocā bacæcāimpa, ante tōmengā Wengā ingante da pōnongā pōninque mōnō wīwa cæinentai bai adotai bai ēñate pægacāimpa. Ēñate pædinque tōmengā nāmā baō nānō ēñayō ante edæ, Wængonguī qui impa, ante pædæ godonte bai cædinque wēnæ wēnæ mōnō cædō beyænque ante wægacāimpa. Mǎnōmaī cædinque Wængonguī mōnitō imōnite apænedinque, Mini wænguinque mīnitō baonga ēñadinque wēnæ wēnæ cæmīni awædō, ante apænte angacāimpa. <sup>4</sup> Mǎnōmaī pōnō cædinque tōmengā, Wīwa cæinente mīni wæwēnō ante ēñente cædāmaī inte mīnitō ñōwo wæætē botō Ōnōwoca ingante ēwocadinque tōmengā beyænque quēwēmīnīpa. Īninque nō pōnī botō wææ angāinō ante tōmānō ante ēñēninque nō cæte quēwencæmīnīmpa, ante cægacāimpa.

<sup>5</sup> Adopoque ēñadinque baonque nē ēñadāni guiquēnē wīwa cæinente nāni wæwēnō ante pōnente cædānīpa. Mempoga ēñadinque Wængonguī Ōnōwoca ingante nē ēwocadāni guiquēnē tōmengā nānō ānonque ante pōnente cædānīpa. <sup>6</sup> Wīwa



cæinente nāni wæwënö ante cæcæte ante nē pönëwënāni guiquënë tōmënāni nāni wænguinque mǎninö ante pönëwënānipa. Wæætë Wængonguï Önöwoca angä ëñente nē pönënāni guiquënë tōmënāni nāni gänë entawente quëwenguinque edæ mǎnömaï pönënānipa. <sup>7</sup> Waodāni wīwa nāni cæinente wæwënö ante cæcæte ante nē pönëwënāni iñömö edæ Wængonguï ingante piinte cædānipa. Wængonguï nānö wææ änö ante tōmënāni önömoncaque ëñënāni inte edæ wīi ëñente cædānipa. Iñæmpa tōmengä Önöwoca ingante ëwocadānipa diyæ ëñente cæquinānii. <sup>8</sup> Wīwa cæinente nāni wæwënö ante cæcæte ante nē cædāni iñömö, Wængonguï waa acæcäimpa, ante ancaa cædāni incæte Wængonguï wæætë edæ waa todāmaï incæcäimpa.

<sup>9</sup> Minitö guiquënë Wængonguï Önöwoca ingante ëwocamīni iñinque edæ wīwa cæinente mīni wæwëninö ante cædāmaï inte quëwëmīni imaimīnipa. Wæætë edæ tōmengä Önöwoca angä ëñente cæte quëwëmaïmīnipa. Incæte waocä æcāmenque incæ Codito Önöwoca ingante ëwocadāmaï ingä iñinque tōmengä wæætë Codito nempo quëwënāmaï imaingampa. <sup>10</sup> Minitö guiquënë Codito ingante entawëmīni iñinque wënæ wënæ mīni cægainö beyænque mīnitö baö incæ tōmengä tönö adopoque wænte baï ëñamīnipa. Incæte Codito nānö nö cædönö entawëmīni inte mīnitö önöwoca mempoga ëñate baï mīiwoca ëwocamīnipa. <sup>11</sup> Itota ingante Wæmpocä, Ñāni ömæmöe, angä ëñëninque ñāni ömæmongacäimpa. Ayæ mīni baö ñömæintai

eñayöminite tömengä Önöwoca pö guiddinque quëwengä ïinque Wæmpocä wæætë mïnitö ïminite, Ññani ömæmöe, ante adobaï angä ññani ömæmoncæminimpa. Edæ tömengä Önöwoca mïni nê ewocadongä tönö tömengä pönö cæcä ate mïnitö baö incæ ñömænämaï intai bacæimpa.

<sup>12</sup> ïinque botö tönïñamïni eññeedäni. Wængonguï Önöwoca angä ate mönö eññente cæquënëmö ïmompä. Wæætë wïwa cæinente mönö wæwënö ante wïï eññente cæte quëwenguënëmö ïnömö ïmompä. <sup>13</sup> ïñæmpä wïwa cæinente mïni wæwënö ante eññente cæmïni ïinque mïni æmæwo wænguinque cæbäimïnipä. Wæætë Wængonguï Önöwoca ingante ewocadinque mïnitö wïwa mïni cædinö ante wido cæmïni ïinque mïni quëwenguinque ïmaimpa.

<sup>14</sup> Ædänidö ïñanite Wængonguï Önöwoca töö æmænte angä ate eññente goda ïñömö tömënäni ïñömö edæ Wængonguï wënäni ïñanipa. <sup>15</sup> Mïnitö guïññente mïni wægäinö beyænque ññä cæyænte baï nê quëwengäimïni inte ññowo wæætë Wængonguï Önöwoca ingante æninque wïï adobaï guïññente wæmïni ïmïnipä. Wæætë Wængonguï Önöwoca pönö cæcä beyænque mïnitö näwä wëmïni bamïnipä. Ayæ tömengä Önöwoca pönö cæcä ænte ewocadinque mönö guïññenedämaï inte edæ, Mæmpo, botö Wæmpo, ante apænemompä. <sup>16</sup> Edæ mönö mïmönê ponte apænedinque Wængonguï Önöwoca incæ, Bitö Wængonguï näwä wëmi ïnömi ïmipa, ante apænecampa. <sup>17</sup> ïinque mönö Wængonguï wëmö ïnömö inte tömengä nänö pönonguincoo nê ænguïmö

imompa. Edæ Codito tönö aanque bai caate wæmö inique mönö tömengä ñäö bai nänö emö bai ñäö adobai emöinque tömengä tönö edæ godongämæ ænguimö imaimompa.

*Ñäö bai mönö entawenguimämo*

<sup>18</sup> Botö iimaï ante pönemopa. Ñöwo caate mönö wæpämö iñömö pönömenque iñonte ñincayæ ate ñäö bai mönö emonguimämo guiquenë wii adobai wædænque inte godömenque nangui pöni ingæimpa. <sup>19</sup> Æyedönö Wængongui wënäni tæi emonte badinque edonque a ongonguinänii, ante acæte ante edæ Wængongui nänö badongaincoo incæ nangui ainente wædinque wänö conte bai ongoncoopa. <sup>20</sup> Edæ wënæ wënæ cædämaï incoo iñonte mönö waocabo mönö eññänamaï cægainö beyæ Wængongui nänö badongaincoo önoncooque bai bagatimpa. Wii nämä änö beyæ mänömaï bagatimpa. Wæætë Wængongui në, ñincayæ ate watapæ bacæimpa, ante angaingä inte adocä angä beyænque önoncooque bai bagatimpa. <sup>21</sup> Edæ Wængongui nänö badongaincoo ñömænguincocooque inte yæguincamenca ñä cæyænte bai wæyoncoote Wængongui gä pe æmpote bai godö cæcä beyænque ñömænämaï inguincocooque bacæcoimpa. Mönö Wængongui wëñæmö iñömonte tömengä pönö ñimpo cæcä ate mönö abæ tawænte bai tæi emonte bamö bai tömengä nänö badongaincoo adobai abæ tawænte bai miincooque bacæcoimpa. <sup>22</sup> Wëñæ nantate, Æiquedö eññaqingäa, ante nani wæ bai Wængongui nänö badongaincoo incæ ñöwo ganca godongämæ nantate bai, Æiquedö waa baquii, ante ö ö wæconcoopa.

<sup>23</sup> Ayæ Wængongui mönō imonte mā pönöningue tömengä Önöwoca ingante pönongä ænte do ewocamö inömö inte mönō adobai, Mönō baö müññö eññaquinque æiquedö Wængongui wēñæmō ædæmō baquii, ante nangui æinente wänö conte ö ö wæmompä. <sup>24</sup> Edæ Codito, Botö iincayæ ate badömo ate watapæ bacæimpa, ante pönëdäni, äningue mönō imonte edæ ængä beyænque quëwëmompä. İningue mäninö edæ, Watapæ bacæimpa, ante nänö angainö iñömö iinque ba acæte ante mönō ayæ wänö cömompä. Mäninö watapæ do ba amö bai mönō, Ayæ ate watapæ ba acæimpa, ante änämaï incædömöimpa. Waocä do æningä inte, Æinente wæbopa, ante quïnante anguingää. İñæmpä edæ dobæ ængantapa. <sup>25</sup> İningue mönō æinente wædö ante mönō cöwë ængæimpa, ante wede pönëmö iinque mönō wæntædämaï inte ee wänö cömompä.

<sup>26</sup> Ayæ adobai mönō aquïmö pönï iñömonte Wængongui Önöwoca mönō beyæ cæcampa. Æbänö cæte Wængongui ingante apænequii, ante eññänämaï inte wæyömonte tömengä wii waomö tededö ante apænedinque tömengä önöwënenque mönō beyæ apænecampa. Mäninö tömengä nänö tededönö ante mönō guiquënënö inte önöneca ædö cæte tedequii. <sup>27</sup> Mönō Wængongui quimö tæiyæ waëmö ewocamö iñömonte Wængongui Önöwoca iñömö mönō beyæ apænedinque, Mæmpo Wængongui nänö angainö bai bacæimpa, ante pönëningue apænecampa. İningue mönō mimöno do adongä inte Mæmpo Wængongui iñömö edæ, Botö Önöwoca æbänö pönëningue apænecää,

ante do eñengampa.

*Nē tæi emöninque mönō gänä cæmō imompa, ante*

<sup>28</sup> Wængonguī, Botō änō bai iinque bacæimpa ante cæcæminimpa, ante mönō imonte aa pegacäimpa. İinque tömengä nänō änō bai nē cæmō inte mönō tömengä ingante waadete pönemō iñomonte Wængonguī wæætē mönō beyænque cöwē waa pönō cæcä ate mönō edæ, Inguipoga æbämē ba incæte mönō waa pönī quëwenguinque impa, ante edæ do eñemompa. <sup>29</sup> Doyedē badöninque Wængonguī iñömō, Botō Wengä Bamoncadengä iñongante iināni tömengä biwīdi badinque nanguī ināni yebænte bacædänimpa, angacäimpa. İinque tömengä mänōmai cæcæte ante cædinque, Do botō nē againāni iñömō tömēnānique botō Wengä nänō entawënō bai adobai entawencædänimpa, ante badongacäimpa. <sup>30</sup> Ayæ, Botō Wengä nänō entawënō bai entawencæminimpa, ante nänō nē angaināni iñönānite do aa pegacäimpa. Ayæ tömengä nänō aa pegaināni adodāni inānite, Botō ayōmo mīnitō nō cæmīni bacæminimpa, ante badongacäimpa. Tömengä ayongä nō cædāni nē bagaināni inānite tömengä, Mīnitō tæi emonte badinque ñäō bai emonte bacæminimpa, ante do badongacäimpa.

<sup>31</sup> İinque æbänō ante anguimoo. Edæ Wængonguī mönō tönō godongämæ cæcä iñongante æcänō mönō imonte bæ taquiringä. Edæ dæ angampa. <sup>32</sup> Tömengä Wengä adocanque iñongante Wængonguī pæ gompodāmai inte da pönongä pöninque tömengä wæætē mönō tömämō beyæ teëmente wæætē wængacäimpa.

Mäningä ingante da pönöningue Wængongui tömengä nänö äagaincoo ante ædö cæte pönönämaï inguingää. Edæ, Botö Wengä tönö godongämæ entawencæminimpa, ante Wængongui tōmancoo do pōnongä æmōmpa. <sup>33</sup> Wængongui mönō imonte apænte ængä ongõñomonte æcänö, Wiwa cæbipa töö, ante apænte anguingää. Ìñæmpa Wængongui incæ, Botö ayömo mīnitö edæ nō cæmīni imīnipa, ante badongä bamöimpa. <sup>34</sup> Itota Codito nē wængaingä inte godömenque ñāni ömæmongaingä inte Wængongui tömēmæ inö do tæ contate a ongongampa. Ayæ mönō beyæ Wængongui ingante cōwē apænecampa. Tömengä mänömaï cæcä adinque mönō imonte æcänö, Bitö wænguinque, ante apænte anguingää. Ìñæmpa wīi eyepæ inānipa.

<sup>35</sup> Codito mönō imonte waadete pönente aayongä æcänö gä pe æmpote ö ænguingää. Edæ, Ædö cæte cæquimöö, ante wæmō incæ caate wæwēmō incæ mönō imonte togænte pänāni wæmō incæ mänömaï wæyömonte mönō Codito dicæ mǎniñedē edæ waadedämaï inguingää. Mönō wænguinque gue ænente wæmō incæ weocoo ömaamö inte wæmō incæ tömengä mönō imonte dicæ waadedämaï inguingää. Quiēmē beyæ, Mini wænguinque, ante wææ änāni wæyömonte yaēmenca tacadāni wæyömonte Codito mǎniñedē dicæ waadedämaï inguingää. <sup>36</sup> Edæ Wængongui ingante ämotamīni ante bai yewæmongatimpa.

“Bitö beyænque wænönāni wængui wæ, ante  
mönitö tömää itæde wæmönipa.

Obegaidi inānite, Wængongæimpa, ante änāni bai,

mönitö imönite adobai, Wæñongæimpa, ante  
piināni wæmönipa,”  
ante yewæmonte ongö aedāni.

<sup>37</sup> Edæ mänimāmo mönö wæpāmo tömāmāmo  
pö ate wædömö incæte mönö imonte nē waadete  
pönengä nempo ongöñinque mönö tæi emonte  
godömenque gänä cæte ongömompa. <sup>38</sup> Botö do  
ēñente pönēmopa. Mönö nē waadete pönengä  
nempo ongöñomonte mönö wænguimāmo  
incæ mönö quëwenguimāmo incæ anquedoidi  
incæ wænæidi incæ ñowopāmo incæ iincayæ  
ponguimāmo incæ tæi nāni piñæmāmo incæ  
mänimāmo tömāmāmo ædö cæte mönö imonte  
gä pe æmpote ö ænguü. <sup>39</sup> Ayæ edæ æibæ mönö  
æite wæquimāmo incæ guibæ mönö wæænte  
wæquimāmo incæ quiëmë Wængongui nänö  
badongaimāmo incæ mänimāmo tömāmāmo iñömö  
mönö Codito nempo ongöñomonte ædö cæte  
gä pe æmpote ö ænguü. Edæ Wængongui nänö  
waadete pönënö entawëñinque mönö Awënë Itota  
Codito iñömö mönö imonte waadete pönëñinque pæ  
gompyongante mänimāmo tömāmāmo incæ Gä pe  
æmpote ö ænämaï ingæimpa. Ämo ëñëmaïminipa.

## 9

*Idægoidi inänite Wængongui apænte angacäimpa,  
ante*

<sup>1</sup> Botö iñömö edæ mimö entawëmo inte  
nämä apænte pönëñömote Wængongui Tæiyæ  
Waëmö Önöwoca adoyömö ante apæñecä iñinque  
botö ædö cæte babæ wapiticæ anguïmoo.  
Edæ Codito nempo quëwënömo inte botö nö  
pöni apæñedinque iïmaï ämopa. <sup>2</sup> Mimöno

cōwē cæwēnente wæwēmo inte botō iīmaī ante pōnēninque nanguī wæbopa. <sup>3</sup> Botō guidēnāni botō tōnō adodāni inōnāni iñōnānite Wængonguī ængā beyænque quēwencædānimpa, ante botō nanguī āninque wæbopa. Īninque Wængonguī tōmēnāni inānite, Quēwencæmīnimpa, ante æninque wæætē botō Codito nempo quēwēñōmote botō imote piīninque tatodonte wido cæcā bai botō Ao ante piyænē cæcædōmoimpa.

<sup>4</sup> Tōmēnāni iñōmō idægoidi inānipa. Wængonguī pæpogacā pædāni ĩninque tōmēnānique tōmengā wēnāni ingadānimpa. Tōmēnāni inānite Wængonguī ñāō entawente nānō tæī ēmōnō ante odōmongā adinque tōmēnānique nē agāināni inānipa. Tōmēnāni inānite apænedinque Wængonguī, Botō pōnō cæbo ate mīnitō Ao āmīni ĩninque mōnō godongāmæ waa cæcæimpa, ante cægacāimpa. Īīmaī cæedāni, ante tōmengā tōmēnāni inānite tāno wææ angā ēñente mānīnō nānō wææ angāinō ante tōmēnānique nē mangāināni inānipa. Wængonguī oncōnē ñæñæncōnē wadāni guidāmaī iñōnānite idægoidique guite tōmengā ingante waa ate ædæ wæænte apænedānipa. Tōmēnānique inānite Wængonguī, Cōwē waa cæcæboimpa, ante mā apænegacāimpa. <sup>5</sup> Mōnitō, Mæmæidi, ante mōni nē angāināni incæ idægoidi mæmæidi adodāni inānipa. Īninque tōmēnāni Pæingā badinque mōnō Codito inguipoga ēñagacāimpa. Tōmengā iñōmō tōmāmō Wængonguī ĩnongā ingampa, ante adinque mōnō tōmengā ingante apænedinque, Tōmēmi toquinque pōnō waa cæbi æmōnipa, ante mōnō cōwē ñimpo cædāmaī apænecæimpa. Mānōmaī



impa, ante botö, Amëë, ämopa.

<sup>6</sup> Idægoidi quëwencädänimpa, ante nänö angainö bai Wængonguï cädämaï ingacäimpa, ante botö dicæ ämogaa. Wæætë edæ iïmaï impa. Nāwā idægoidi nāni wede pönēnō bai pancadāniya pönēnāmaï ināni iñōnānite botö tōmēnāni inānite, Nāwā idægoidi inānipa, ante apænedāmaï imopa.

<sup>7</sup> Edæ Abadäö wodi pæināni incæ pancadāniya iñōmō, Abadäö wodi wēnāni, mōnō änōnāni wii inānipa. Wæætë, “Botö ayōmo Itæca wēnānique bitö pæināni inguināni inānipa,” ante mæmæ Abadäö ingante Wængonguï angampa, ante yewæmongatimpa. <sup>8</sup> Mänōmaï i iñinque Abadäö tapæicā nē ēñate pædāni inānite Wængonguï, Abadäö wēnāni, ante angantawogaa. Wæætë Abadäö wodi ingante apænedinque, Bitö wēnāni bacädänimpa, ante Wængonguï nänö nē angaināni guiquēnē tōmēnānique tōmengä wēnāni inānipa.

<sup>9</sup> Edæ, “Iñedē impa, ante botö änōñedē botö adodö pōmo ate mänñedē ate edæ Tada incæ wēñængä onguñængä ingante mancæcäimpa,” äninque Wængonguï, Mäninö botö änö bai cōwē cæcæboimpa, angacäimpa.

<sup>10</sup> Wii mäninque impa, ante ēñengæimpa. Godōmenque iïmaï ante mōnō pönengæimpa. Wæmpocā adocanque tapæicā ate Adebeka wodi wēna äancadēnaque ēñagadäimpa. Mänina wæmpocā iñōmō mōnō wæmæ Itæca wodi ingacäimpa. <sup>11</sup> Tōmēnā wēna ayæ ēñadāmaï iñedē ædö cæte wēnæ wēnæ cæquīnaa, ædö cæte waa cæquīnaa. Incæte edæ Wængonguï, Iñgä ingante apænte æncæboimpa, ante nänö

angainö ante cöwë bacæimpa, ante cædinque,  
<sup>12</sup> tömëna ayæ cædämaï iñönate Wængongui nê aa  
 pedongä inte, “Bamoncadengä incæ ayæmengä  
 ingante nê cæcä incæcäimpa,” ante Adebeca  
 wodi ingante apænegacäimpa. <sup>13</sup> Adobainö  
 ante Wængongui beyæ yewæmongadänimpa.  
 “Aacobo ingante waadete pönengaboimpa. Etawoo  
 ingante guiquënë piinte agaboimpa,” ante  
 yewæmongatimpa.

<sup>14</sup> İninque mönö æbänö anguii. Wængongui dicæ  
 nö cædämaï ingantawogaa. <sup>15</sup> Wæætë Möitee  
 wodi ingante apænedinque Wængongui iïmaï  
 angacäimpa. “Waocä adocanque ingante botö,  
 Wii päinewædö, äninque tömengä ingante do godö  
 ñimpo cædinque pänämaï incæboimpa. Adocanque  
 ingante nê waadete cæinëmo inte botö tömengä  
 ingante do godö waadete waa cæcæboimpa,”  
 angacäimpa, ante yewæmongatimpa. <sup>16</sup> İninque  
 waocä nanguï cæinengä incæte waocä nanguï  
 cæcä incæte Wængongui wii waocä nänö cædö  
 beyænque apænte ængampa. Wæætë nämä nänö  
 waadete waa cæinënö beyænque Wængongui  
 waocä ingante godö apænte ængampa. <sup>17</sup> Edæ  
 awënë Padaönö wodi ingante apænedinque  
 Wængongui, “Botö iïmaï ante cæcæte ante bitö  
 imite ængö cætabopa. Edæ bitö imite ængö  
 cædinque tæi piñænte pönö cæbo adinque  
 woadäni, Wængongui tæi piñængä inte mänömaï  
 cæcampa, ante botö emöwo ante inguipoga tömäo  
 apænedäni do eñencädänimpa, ante cætabopa.”  
 Wængongui mänömainö ante Padaönö ingante  
 apænecantapa, ante yewæmongatimpa. <sup>18</sup> İninque

Wængonguï, Adocanque ingante godö waadete ñimpo cæcæboimpa, äninque tömengä ingante do godö waadete ñimpo cæcampa. Wæætë wacä ingante guiquënë, Godö cæbo ate mīmō ömædengä bacæcäimpa, äninque Wængonguï tömengä ingante do cæcä ate edæ mīmō ömædengä bate wæcampa.

<sup>19</sup> Mänömainö ante yewæmōmo adinque bitö wabänö iïmaï anguïmi, ante awædö. “Iñæmpa mōnitö Wængonguï nänö änö ante Baa änämaï iñömōnite tömengä, Minitö beyænque impa, ante quïnante püinte angää.” Mänömainö ante ämitawoo.

<sup>20</sup> Bitö iñæmpa önōmique inōmi inte Wængonguï ingante wæætedö wæætë ämii. Nē badongä ingante tömengä nänö nē badōninca incæ dicæ, “Botö imote quïnante mänömaï badöwēmii,” ante dicæ anguïi.

<sup>21</sup> Nē bædongä iñömō daibo pancaiya æninque waa pōni wamoncade bædinque ado daibo pancaiya æninque önonque ewenguincade bæyongante æcänö nē bædingä ingante Baa anguingää. Nē bædongä iñömō nē änongå inte bæcampa. Edæ Baa anguïmii.

<sup>22</sup> Wængonguï nänö nē püinani iñömō tömēnani nani ömæe ewente wæquinque wiwa cæyōnānite tömengä piyænë cædinque wantæpiyæ pänämaï inte ee ongongantawo. Iñæmpa tömengä nänö püimāmo ante adinque do wæcædänimpa, ante cædinque ayæ tömengä nänö tæi piñæmāmo ante edonque acædänimpa, ante cædinque Wængonguï mänömaï ee ongongä apa anewëe. <sup>23</sup> Ayæ wæætë, Botö waadete godö waa cæbo ænani inte edæ tömēnani iñömō botö ñäö bai botö emōnō ante acædänimpa, ante cædinque Wængonguï mänömaï

pänämaï inte edæ ee cæcampa. Wæætë, Tömënanï ñäö iñömö quëwencædänimpa, ante tömengä godö badongä ate tömënanï ñäö bai ëmönänipa. <sup>24</sup> Edæ möni oodeocabo iñömönite mïnitö oodeomïni inämaï iñöminite Wængonguï mönö tömämö imonte mänömaï cæcæte ante aa pegacäimpa. <sup>25</sup> Wængonguï iïmaï angampa, ante Ootea wodi yewæmongacäimpa.

“Botö guidënanï inämaï iñönänite botö wæætë,  
 Botö guidëmïni, ante apænecæboimpa.  
 Onquiyængä botö në waadedämaï ingaingä  
 iñongante botö wæætë,  
 Botö në waadebi imipa, ancæboimpa.

<sup>26</sup> Ayæ, ‘Botö guidëmïni inämaï imïnipa,’ ante botö ongonte añömö adoyömö ongöningue botö wæætë edæ, ‘Botö Wængonguïmo në Quëwëmo wëmïni imïnipa,’ ancæboimpa.”

Ante adocä Wængonguï nänö änö ante yewæmongacäimpa. <sup>27</sup> Idægoidi inänitedö ante yedæ äningue Itaiya wodi iïmaï apænegacäimpa. “Gäwapæ wedeca ëmönaïcoo nanguï pönï öñö bai idægoidi adopodäni nanguï pönï inäni incæte pancadäniya guiyä wææntodönï bai mänimpodänique quëwencædänimpa. <sup>28</sup> Edæ Wængonguï, Inguipoga quëwënänï inänite apænte äningue botö angainö bai do edæ cæcæboimpa, ante në apænegaingä inte tömengä adocä, Idæwaa, ante quingæ pönï edæ iinque cæcæcäimpa,” ante Itaiya wodi yewæmongacäimpa. <sup>29</sup> Adocä Itaiya wëënë iïmainö ante nänö apænegaïnö bai impa.

“Mönö Awënë në Tæiyæ Awënë tæi piñænongä inte dodäni inänite, Mïnitö pæinänï yebænte nanguï inäni bacædänimpa, ante

cædinqe pancadäniya inänite ata cæpocä  
 quëwengadänimpa. Mänömaï ante cædämaï  
 ingä bai,  
 mönö wæætë Todömä quëwengainäni bai dæ bad-  
 inque Gömoda näni quëwëñömö dæ ba bai  
 mönö adobai edæ dæ bacædömöimpa,” ante  
 nänö angainö bai impa.

*Idægoidi adobai pönëninque quëwenguënänäni  
 inänipa*

<sup>30</sup> Ininque æbänö ante anguii. Oodeo inämaï  
 inäni guiquënë, Nö entawëmöni bacæmönimpa,  
 ante änämaï ingadänimpa. Incæte Wængongui godö  
 cæcä beyænque tömënäni wede pönëninque wede  
 näni pönënö beyænque Wængongui ayongä nö  
 entawënäni do badänipa. <sup>31</sup> Idægoidi guiquënë,  
 Nö cædäni, ante möni wææ angainö beyænque  
 nö entawëmöni bacæminimpa, ante në angainäni  
 inte eyepæ cædämaï inänipa. <sup>32</sup> Quinante eyepæ  
 cædämaï inänii. Tömënäni wede pönënamäi  
 inäni inte wæætë edæ, Mönö nanguï cædinqe  
 nö cæmöni bacæmönimpa, äninque oda cæte  
 näni pönënö beyænque dicaboga tee tēwate bai  
 cædinqe eyepæ cædämaï ingadänimpa. <sup>33</sup> Edæ do  
 Wængongui beyæ yewæmongatimpa.

“Aquënë quëwënänii. Botö Codito ingante Tiöno  
 näni quëwëñömö dica bai gö cæbo gongængä  
 adinque edæ

waodäni dicaboga tee tēwate bai pönënamäi inäni  
 inte tæ go wææncædänimpa.

Tömengä adocä ingante në pönengä guiquënë  
 cōwë edæ guingo imönämaï inte  
 quëwencæcäimpa,”

ante yewæmongatimpa.

## 10

<sup>1</sup> Botö tönĩñamĩni eñeedäni. Idægoidi quëwencädänimpa, ante botö mimönë nanguĩ aĩnente wædinque Wængonguĩ ingante apænedinque botö, Bitö æmi beyænque quëwencädänimpa, ante cöwë apænebopa.

<sup>2</sup> Wængonguĩ beyæ nö cæcæimpa, ante cæĩnente wädänipa, ante nāwangä impa. Incæte tømēnāni, Wængonguĩ beyæ nö cæcæte ante æbānō cæquĩi, ante eñēnāmaĩ ĩnāni inte önonque cæte wädänipa. Botö, Mänömaĩ impa, ante nē apænebo ĩnōmo ĩmopa. <sup>3</sup> Edæ Wængonguĩ pönö badongä ate mönö tømengä ayongä nö entawēmö bamompa, ante eñēnāmaĩ ĩnāni inte idægoidi ĩñömö, Nāmā mönö cädö beyænque nö cæmö bacæimpa, ante cædinque edæ oda cægadänimpa. Mänömaĩ cædinque tømēnāni Wængonguĩ nānō nö cægainö ante edæ Baa angadänimpa. <sup>4</sup> Nö cæmö bacæte ante Wængonguĩ nānō wææ angainö ante eñente cæquēnēmö inte mönö tømāmö wĩi eyepæ inte wægamöimpa. Mänömaĩ inte wæyömonte Codito ĩñömö, Mini pönencabo Wængonguĩ ayongä nö entawēmĩni bacæmĩnimpa, ante cædinque mänĩnō Wængonguĩ nānō wææ angainö ante tømānō ante ĩinque cægacäimpa. ĩinque tømengä mänömaĩ ĩinque cæcä adinque Wængonguĩ mönö ĩmonte wæætē wææ änāmaĩ ingampa.

<sup>5</sup> ĩĩmaĩ cæedäni, ante botö wææ angainö eñente cædinque nö cädäni badänipa, ante Möĩtee wodi ĩĩmaĩ ante yewæmongacäimpa. “Nē eñente cæcä ĩñömö tømengä nānō eñente cädö beyænque

quëwencäcäimpa,” ante yewæmongacäimpa.  
<sup>6</sup> Wæætë, Mönö wede pönencabo æbänö cæte Wængongui ayongä nö entawëmö imöö, ante iïmaï ante adocä yewæmongacäimpa. “Bitö, ‘Æcänö öönädë æi añete wæænguingää,’ ante nämäneque änämaï ie.” Mänömaï ante tömengä, Codito ingante æi añete wææncæte ante mönö pönänämaï ingäimpa, ante ancæte ante yewæmongacäimpa. Iñæmpa Codito pönämaï ingampa diyæ æite mäwæmi wæænguingää. Dobæ edæ inguipoga pongacäimpa. <sup>7</sup> “Ayæ, ‘Æcänö tadömengadæ wæi añete ænguingää,’ ante änämaï ie.” Iñæmpa Codito ayæ öñongampa diyæ wæite mämi æænguingää. Edæ Codito dobæ ñäni ömæmonte quëwengampa.

<sup>8</sup> Iñinque, Mönö wede pönencabo æbänö nö cæmö bamöö, ante æbänö ante yewæmongacäi. Edæ, Wede pönengäimpa, ante mönitö apænemöni mini ëñënine ante adode ante iïmaï ante yewæmongacäimpa. “Wængongui nänö nö änöne iñömö edæ bitö weca eyequei pöni ënëpa. Edæ bitö önöne tedeyömi bitö mimöno pönëñömi tömengä nänö nö änöne edæ adoyömö pöni ënëpa.” <sup>9</sup> Æbänö cæte quëwenguï, ante iïmaï ante ënëpa. Itota Codito Tæiyæ Awënë ïnongä ingampa, ante bitö önönëca apænedinque, Itota Codito wænte öñöñongante Wængongui angä ñäni ömæmongacäimpa, ante bitö mimöno pönëmi adinque tömengä ængä beyænque quëwencæbiimpa, ante adode incæ ënëpa. <sup>10</sup> Mimöno edæ wede pönëninque mönö Wængongui ayongä nö entawëmö bamompa. Mänömainö ante wede pönëmopa, ante önönëca apænëyömonte tömengä ængä beyænque mönö

quëwëmompä.

11 Codito ingantedö ante apænedinque, “Tömengä ingante në wede pönengä iñömö tömengä edæ guingo imönämaï incæcäimpa,” ante Wængonguï angä ëñente yewæmongadänimpa.

12 Edæ mönitö oodeomöni iñömönite mïnitö wæætë oodeomïni inämaï iñöminite mönö tömämö imonte adinque mönö Awënë iñömö edæ, Adoyömö pöni iminipa, ante acampa. Ìinque tömengä adocä tömämö Awënë inongä ingampa. Ayæ tömengä ingante aa pemö ëñëninque tömengä iñömö edæ tömämö imonte nanguï pöni pönö cæcä æmompä.

13 Ìïmaï ante Wængonguï beyæ ante yewæmongatimpa. “Mönö Awënë ëmowo ante apænedinque aa pedäni ëñëninque mönö Awënë iñömö edæ tömënäni tömänäni inänite ængä beyænque quëwencædänimpa.” 14 Ìinque tömengä ingante në pönënämaï inäni iñömö ædö cæte tömengä ingante aa pequïnänii. Ayæ tömengä ëmowo ante ëñënämaï inäni iñömö tömengä ingante ædö cæte pönenguïnänii. Ayæ tömengä ëmowo ante wadäni gote apænedämaï iñönäni tömënäni ædö cæte ëñenguïnänii. 15 Ayæ edæ wadäni da godönämaï iñönäni në apænequënënäni wæætë ædö cæte gote apænequïnänii. Ìïmainö ante edæ Wængonguï beyæ ante yewæmongatimpa. “Tömengä waa pöni nänö cægäinö ante në watapæ apænedäni iñömö tömënäni näni apænecæ gote cægöniwa iñömö edæ waa pöni ëwadänipa,” ante näni yewæmonte angäinö bai impä. Edæ në apænecæ godäni inänite Wængonguï waa acampa.

16 Mönö Awënë ingantedö ante watapæ



apænedäni eñëninque idægoidi pancadäniya Ao angadänimpa. Pancadäniya guiquënë Baa angadänimpa. Tömënäni mänömainö nāni cædinö ante Itaiya wodi iimaï ante yewæmongacäimpa. “Awënë Wængongui eñëmi. Mönitö apænemöni tömënäni nāni eñënö ante edæ æcānö eñente pönengää. Iñæmpa nē pönengä iñömö edæ dæ angä awædö,” ante yewæmongacäimpa. <sup>17</sup> Iñinque gode änāni ate nē eñënānique wede pönënāni badänipa. Ayæ Codito nānö änönö ante gode ante apænedäni beyænque nē eñënāni badänipa. <sup>18</sup> Iñinque botö, Mäninö ante idægoidi gobæ ongönänipa diyæ eñënāmaï inguinānii, ämopa. Do eñënānitapa, ante edæ iimaï ante Wængongui beyæ yewæmongatimpa.

“Nē apænedäni inguipoga tömäo gote tededäni eñënänipa.

Waadäni inguipoga nāni quëwenganca quëwëñönānite mäninö tömënäni nāni apænedö ante do eñënänipa,” ante yewæmongatimpa.

<sup>19</sup> Ayæ wæætë, Idægoidi önömonca eñëninque ömæcadäni inänipa diyæ eñënāmaï inguinānii. Do eñënānitapa. Edæ Möitee wodi incæ iimaï ante yewæmongacäimpa.

“Wadäni önönānique iñönānite botö godö waa cæbo adinque

mīni idægocabo wæætë, Mönitö imönite wīi pönö cæbii, ante pīinte wæcæminimpa.

Ayæ wadäni ocai ömæcadäni iñönānite botö godö waa cæbo adinque mīnitö wæætë nē pīinte amīni bacæminimpa,”

Ante cæcæte ante Wængonguī pönö cægacäimpa.  
 20 Itaiya wodi guiquënë Wængonguī beyæ ante  
 guiñenämaï inte apænegacäimpa.

“Wadäni iñömö botö imote ante diqui diqui  
 minämaï inäni incæte do adänitapa.

Ayæ, Wængonguī ingante ainëmönipa, ante änämaï  
 iñönänite, Botö imote aedäni, ante botö  
 odömömo adänitapa.”

21 Äninque Itaiya wodi idægoidi inänitedö ante  
 apænedinque, “Eññenämaï inte Baa änönäni  
 iñönänite botö, Pöedäni, ante tömäa itæde önompo  
 compo compo cæbo incæte pönämaï inänitapa.”

## 11

*Idægoidi pancadäniya inänite Wængonguī apænte  
 cængä*

<sup>1</sup> Ininque botö iïmaï ante apænebopa. Tömengä  
 quinäni iñönänite Wængonguī dicæ idægoidi inänite  
 Baa angantawogaa. Iñæmpa botö adobo näwä  
 idægobo imopa. Abadäo wodi pæïmo inömo inte  
 botö edæ Beencaminö wodi pæïmo inömo inte  
 tömengä pæinäni tönö adocabobo tömëmo inömo  
 imopa.

<sup>2</sup> Idægoidi botö quinäni incädänimpa,  
 äninque Wængonguī wëenëñedë pönï mönitö  
 imönite adinque do apænte ængacäimpa. Ininque  
 mönitö tömengä nänö në agaïmöni iñömönite  
 tömengä cöwë Baa änämaï ingacäimpa. Idægoidi  
 inänite piinte äninque Ediya wodi Wængonguī  
 ingante apænegacäimpa, ante æbänö yewæmonte  
 ongompa, ante mïnitö adämaï imïnitawo.

<sup>3</sup> “Awënë eñëmi. Bitö beyæ në apænedäni inänite  
 wænöninque idægoidi godömenque cædinque,

Wængonguī quī, ante nāni iya tāinca bæ tadinque edæ wido cædānitapa. Ayæ botō adoboque inte edæ ayæ quēwēñōmote botō imote wænoncæte ante cædāni wæbo abi.” <sup>4</sup> Æñongante Wængonguī, “Īñæmpa botō tiæte mīdo ganca mānimpodāni inānite, Botō quīnāni inānīpa, ante wææ gompobo quēwēnāni apa quēwēe. Wadāni nāni, Mōnitō wængonguī Baado ingampa, nāni ānongā weca botō quīnāni ĩñōmō edæ da guicapodāmaī inānīpa cæbii,” angacāimpa, ante nāni yewæmongainta adāmaī imīnitawoo.

<sup>5</sup> Nōwo ĩñōmō edæ adobaī impa. Idægomōni mōni cabo incæ mēa pōnī imōni inte Wængonguī ingante Baa ānāmaī ĩñōmōnite tōmengā mōnitō imōnite waadete pōnō cædinque, Botō quīmīni imīnīpa, ante apænte ængampa. <sup>6</sup> Īninque, Wængonguī waadete pōnō cædinque apænte ængampa, ante adinque tōmēmonque waa cæmō beyæ ædō cæte Wængonguī apænte ænguingāā. Īñæmpa tōmēmonque waa cæmō beyæ Wængonguī mōnō imonte apænte ængā bai, Wængonguī waadete pōnō cæcampa, ante ædō cæte anguēnē ī. Wæætē edæ tōmēmonque waa cæmō beyæ Wængonguī apænte ængā bai tōmengā adocā ædō cæte nānō waadete pōnō cædō beyænque mōnō imonte apænte ænguēnengāā. Īñæmpa Wængonguī waadete pōnō cædinque apænte ængā ĩninque, Tōmēmonque waa cæmōmpa, ante ædō cæte anguīī.

<sup>7</sup> Mānōmaī ī ĩninque æbānō ante anguīī. Edæ idægoidi tōmēnāni nāni nanguī æīnēnō ante diqui diqui minte ænāmaī ĩñōnāni mōnō ĩñōmō Wængonguī nānō nē apænte ængālmō imō ĩñōmō

edæ do æntamompa. Nē ænāmaī ināni inānite Wængonguī ee ayongante mīmō ömædēnāni bagadānimpa. <sup>8</sup> Iīmaī ante Wængonguī beyæ nāni yewæmongainō bai ingatimpa. “Tömēnāni inānite Wængonguī godō cæcā ate möwo möinente bai wædāni inte tömēnāni awinca emōnāni incæ ñowo ganca adāmaī inte wædānipa. Önōmonca emoncadāni incæ edæ eñēnāmaī inte wædānipa,” ante yewæmongatimpa. <sup>9</sup> Ayæ awēnē odeye Dabii wodi Wængonguī ingante apænedinque iīmaīnō ante apænegacāimpa.

“Wængonguī eñēmi. Waodāni nāni wænguinque gote ææmæ bedāni bai cædinque iīnāni iñömō edæ wapiticæ nāni towēnōnō ante gote towēnānipa. Incæte bitō godō cæbi ate tömēnāni nāni towēnō beyæ edæ wæncædānimpa, ämopa.

Tömēnāni tee tēwate bai oda cæte wæyönāni bitō godō pämi wæcædānimpa, ämopa.

<sup>10</sup> Bitō godō cæbi ate tömēnāni awinca edæ mæ māmōnte bai bamōninque adāmaī incædānimpa.

Ayæ teēmē mongæninque bocæ ñongænte cōwē wæcædānimpa, ämopa,”

ante awēnē Dabii wodi Wængonguī ingante apænegacāimpa.

*Idægoidi ināmaī ināni quēwēnānipa, ante*

<sup>11</sup> Ñowo wæætē iīmaī ämopa. Do oda cædāni incæ idægoidi iñömō dicæ æmæwo tæ go wæænguīnāni inānitawogaa. Iñæmpa ayæ ate ængæ gantidinque tömēnāni nē quēwenguīnāni inānipa. Incæte Wængonguī, Tömēnāni eñēnāmaī

cædäni beyæ wadäni quëwënäni adinque idægoidi wæætë, Mönö quëwengade impa, ante pïinte wæcædänimpa, ante godö cæcä ate idægoidi edæ oda cægadänimpa. <sup>12</sup> İninque idægoidi ëñënämaï cædinque ænämaï inäni beyæ mönö inguipoga tömämæ mönö quëwencabo wæætë edæ nanguï pönï æmompä. Tömënäni ænämaï inte ömæpodäni wädäni beyænque mïnitö idægomïni inämaï imïni wæætë nanguï pönï æmïnipä. İninque idægoidi näni quëwenguïmämo iincayæ ate eyepæ pönï ænäni ate edæ æbänö baquïi. Edæ idægoidi iincayæ ate eyepæ pönï ænte entawënäni beyænque mönö waocabo tömämö godömenque nanguï pönï ænte entawengæimpa.

<sup>13</sup> Idægomïni inämaï imïni imïnite apænebo ëñëedäni. Botö imote Codito, Idægoidi inämaï inäni inänite apænecæbiimpa, ante da godongä gotabopä. İninque botö, Mïnitö imïnite në apænebo inte tobopä, ante nanguï tedebo. <sup>14</sup> Edæ, Idægoidi inämaï inäni incæ do quëwënänipä, ante botö tedebo ëñente wædinque botö guidënäni idægoidi wæætë, Mönitö adobäi quëwencæmönimpa, ante pïinte wæcædänimpa, ante tedebo. Ayæ adodäni pancadäniya godömenque pönëninque quëwencædänimpa, ante cædinque botö edæ nanguï tedebo.

<sup>15</sup> Idægoidi inänite Baa ante wido cædinque Wængonguï wæætë inguipoga tömämæ quëwëmö iñömonte piyænë cædinque edæ waadete pönö cægacäimpa. İninque tömengä iincayæ ate idægoidi inänite Ao ante ængä ate edæ æbänö baquïi. Mäniñedë ate edæ mönö wænte öñonte bäi inömö

inte edæ mönö ñäni ömæmonte quëwengæimpa.  
 16 Iimaï ante pönengæimpa. Päo pancaboga  
 pancæte bai wædænque inäni inte tãno nãni  
 pönente quëwencabo iñömö tæiyæ waëmö inäni  
 ïinque ïincayæ nãni pönente quëwencabo guiquënë  
 päo babo bai adobai inäni inte tömënäni adobai  
 tæiyæ waëmö inänipa, ante pönengæimpa. Tãno  
 pönengainäni guiquënë tæcæguinto bai inönäni inte  
 tæiyæ waëmö inäni ïinque edæ ïincayæ pönënäni  
 guiquënë yæpænto bai inönäni inte adobai tæiyæ  
 waëmö inänipa.

17 Odibowæ önonque pæwæ incæ wainca  
 incacæimpa, ante cædinque waocã tömengä nãnö  
 mingaiwæ waa pönï incawæ adinque yæpængö  
 nämænte godö önonque pæwæ yæpæntoga  
 mine timongä aminipa. Idægoidi iñömö waocã  
 nãnö minte pæwæ bai iñönänite Wængongui  
 pancadäniya inänite yæpængö wæi ñæmænte  
 bai wido cæcã wædänipa. Tömënäni mänömaï  
 wæyönäni bitö guiquënë önonque pæwæ yæpængö  
 bai imitapa. Incæte Wængongui, Odibowæ  
 yæpængoncoo bai tæcæguinto beyænque odæ yate  
 bai pæte incacæimpa, ante odibowäa yæpæntoga  
 godö mini tinte bai cædinque bitö imite waadete  
 pönö cæcã ate bitö idægoidi beyænque müimi inte  
 ongömipa. 18 Mänömaï i ïinque bitö wæætë edæ,  
 Wængongui botö imote pönö cæcæte ante tömënäni  
 inänite wido cæcampa, ante bitö nämä ængö cæcæte  
 ante cædinque idægoidi inänite ante wii piinte  
 ancæbiimpa. Iñæmpa tæcæguinto ëwa bai inäni inte  
 idægoidi iñömö edæ bitö beyæ dicæ quëwënäniyaa.  
 Wæætë edæ tæcæguinto ëwa bai inäni beyænque

bitö quëwëmpa, ante apænebo ëñëninque bitö pïimi ïinque, Mänömaï impa, ante täno pönëe.

<sup>19</sup> Ìinque bitö, “Odæ yacæimpa, ante cædinque godö mïne tímönäni bai Wængongui botö imote pönö cæcæte ante cædinque idægoidi ïänite wæætë wido cæcampa,” ante pönëmitawoo. <sup>20</sup> Bitö pönëno edæ näwangä impa. Incæte edæ tömënäni nani pönënämaï inö beyænque Wængongui tömënäni ïänite wido cægacäimpa. Bitö guiquënë wede bitö pönëno beyænque müimi inte ongömipa. Ìinque bitö guïñente wædinque edæ nämä ængö cædämaï inte edæ, Botö waëmö imo beyæ cæcantapa, ante pönënämaï imäwe. <sup>21</sup> Ìñæmpa näwä yæpængö bai ïäni ïänite Wængongui tapodämaï ïongä inte bitö önömique ïñömite dicæ ata cæpoqingäa.

<sup>22</sup> Ìinque, Wængongui në waadete cædongä incæ cöwë në apænte pangä ingampa, ante pönëe. Tömengä ïñömö në oda cædäni ïänite pangampa. Wæætë bitö në waadete cædongä nempo quëwëmi ïinque tömengä bitö imite waadete cæbaingampa. Incæte tömengä nempo wïi quëwëmi ïinque tömengä wæætë bitö imite edæ wæi ñæmænte bai wido cæbaingampa. <sup>23</sup> Idægoidi guiquënë, Idæwaa pönënämaï inte awædö, ante ocæ ëmænte pönäni adinque Wængongui në tæi piñænogä inte tömënäni ïänite wæætë ado awæ yæpæntoga godö mïni tímonte bai pönö cæcä ate müinäni edæ ongömaïnänipa. <sup>24</sup> Waodäni waa incawæ yæpængö nämænte önönque pæwæ yæpæntoga godö nani mïne tímönö bai Wængongui wïi adobai cæcampa. Wæætë edæ bitö önönque pædiwæ yæpængö bai ïñömite tömengä waadete pönö

nämænte bai cædinque, Nāwā idægobi babipa, ante waa pæwæ yæpæntoga godō mīni tīmonte bai cæcampa. Bitō imite mǎnōmaī waa cæcā inongā inte tōmengā idægoidi inānite æbānō godōmenque waa cæbaingāā. Tōmēnāni iñōmō waa pōni pæwæ yæpængoncoo tōmengā nānō wæi ñæmæncōo bai inte wæyōnānite adowænē yæpæntoga godō mīne tīmonte bai cædinque tōmengā tōmēnāni inānite, Nāwā idægomīni inte mīnitō wæætē mīimīni ongoncæmīnīmpa, ante do cæcæcāīmpa.

*Idægoidi iñque bayonte quēwencædānīmpa, ante*

<sup>25</sup> Iñānāni ēñēedāni. Mīnitō nāmā ængō cædāmaī incæmīnīmpa, ante cædinque botō wēēñēdē mīni ēñēnāmaī ingainō ante edæ wææ āmopa. Mīnitō idægomīni ināmaī imīni mīni pōnencabo eyepæ pōni mīni yebænganca idægoidi iñōmō ñōwo mīmō ōmædēnāni inte wædōnāni inte edæ māninganca cōwē mīmō ōmædēnāni inte wæcædānīmpa. <sup>26</sup> Iñcayæ ate guiquēnē idægoidi tōmānāni quēwenguīnāni inānīpa. Edæ iūmaī ante yewæmonte ongompa.

“Mōnō ñā cæyænte bai tee mōnete bai wæwēñōmonte nē Ñīmpo Cæcā iñōmō Tiōno iñōmō quēwente poncæcāīmpa.

Aacobo wodi pæināni Wængonguī ingante ēñēnāmaī cæte quēwēnāni adinque nē Ñīmpo Cæcā iñōmō tōmēnāni nāni ēñēnāmaī entawēnō wadæ cæcā ate tōmēnāni wæætē ēñente cæte quēwencædānīmpa.

<sup>27</sup> Iñique wēnæ wēnæ nāni cægainō ante wadæ cæte wido cædinque Wængonguī tōmēnāni inānite iūmaī angampa.



Botö pönö cæbo ate mīnitö Ao ämīni īnīnque  
edæ mōnō godongāmæ waa cæte  
quēwengæīmpa, ante Wængonguī  
angampa,” ante yewæmongadānīmpa.

28 Codito ingantedö ante watapæ ēñente  
pönēnīnque mīnitö idægomīni īnāmaī īmīni do  
quēwēmīni beyæ idægoidi wæætē Wængonguī  
īngante pīinte adānīpa. Incæte tōmēnāni mæmæīdi  
īnānite nē apænte ængaingā inte Wængonguī  
wæætē mæmæīdi beyænque ante pönēnīnque  
ñōwodāni īnānite waadete pōnengampa. 29 Edæ  
waomö īmonte quincoomē pōnongā æñōmonte  
Wængonguī adodö ö ænāmaī ingampa. Ayæ  
adobaī waomö īmonte aa pedīnque tōmengā wadö  
ante änāmaī inte edæ adodö ante edæ cōwē aa  
pecampa. 30 Mīnitö wēēnēñedē ēñēnāmaī cæmīni  
īncæte Wængonguī īñōmō idægoidi ēñēnāmaī  
cædāni beyæ mīnitö īmīnite wæætē waadete  
cædīnque pönö ata cæpocā quēwēmīnīpa. 31 Ayæ  
adobaī mīnitö īmīnite pönö waadete ata cæpocā  
quēwēmīni beyæ idægoidi ēñēnāmaī cædāni  
īñōnānite Wængonguī ñōwo tōmēnāni īnānite adobaī  
waadete cædīnque godö ata cæpocā quēwēnānīmpa.  
32 Īnīnque tōmengā, Mīni waocabo tōmāmīni īmīnite  
botö waadete cædīnque pönö ata cæpocæboīmpa,  
ante cædīnque, Mīni ēñēnāmaī cæcabo īnōmīni  
inte mīnitö nāmā eö toyænte aamö cædāmaī  
īncæmīnīmpa, ante tōmāmö īmonte ñā cæyænte  
baī cæcā wæcongāmōīmpa.

33 Īnīnque Wængonguī nanguī pōnī waadete  
entawēnongā īñongante tōmengā nānō pönö cædōnō  
ante mōnō ædö cæte tee mante aquīī. Tōmengā

tömancoo do adongä inte nangui pöni eñenongä inte cæcä ingänö anguënë. Tömengä edæ, Æbänö i, ante do againgä inte edæ, Æbänö cæquii, ante do apænte añongante mönö waocabo wæætë tömengä nänö cædö ante ædö cæte eñenguü. Tömengä ædönö ponte ædönö gocää, ante pönente wædinque mönö tömengä önöwa amompa diyæ taadö aquü. <sup>34</sup> Edæ iimaï ante nani yewæmongainö bai impa. “Mönö Awënë æbänö pönengää, ante pönente wædinque æcänö eñengää. Ayæ, iimaï cæqui impa, ante mönö tömengä ingante edæ ædö cæte odömonte apænequü. <sup>35</sup> Wængongui ingante æcänö do godongä inte wæætë, Bitö debe imipa, ante anguingää. Iñæmpa tömengä ingante godömompa diyæ debe inguingää,” ante Itaiya wodi nänö yewæmongainö bai impa. <sup>36</sup> Edæ tömengä nänö pönongaincooque inte edæ tömancoo ongompa. Mönö waocabo iñömö tömengä badongä beyænque tömengä quimö baquinque ongömompa. Ayæ adobai edæ tömengä badongä beyænque tömancoo tömengä quincooque edæ baquinque ongoncoopa. Edæ tömengä adocanque pöni ñäö entawente edæ cöwë tæi ëmoncæcäimpa. Mänömaï impa, ante mönö, Amëe, ante apænecæimpa.

## 12

*Wængongui quimö imompa, ante cæte quëwengæimpa*

<sup>1</sup> Botö töninamini eñeedäni. Wængongui waadete pönö waa cæcä ængaimini inte minitö iimaï cæedäni, ante botö nangui ämopa. Wængongui

quī, ante baō pædæ godönäni waa ængä bai mīnitō adobai edæ, Wængonguī quīmōni imōnipa, ante mīimīni inte edæ tōmengä ingante nämä pædæ godōmīni ængædäni. Mänōmaī cædinque mīnitō tōmengä önōwa inō mīni ædæ wæænte nanguī cæquēnēnō ante edæ do cæmīni incæmīnimpā. Mänōmaī godōmīni ænīnque tōmengä wæætē edæ, Botō ayōmo tæiyæ waēmō pönōmīni æmopa, ante tocæcāimpā. <sup>2</sup> Inguipogaque ante pōnente mīni cægāinō ante ñōwo ñimpo cædinque mīnitō mīimīni mīni quēwengūnque ante edæ ocai mīnīnque encate bai nōingä ante pōnēedāni. Mänōmaī cædinque mīnitō, Wængonguī waa pōni nānō änōnō ante, Æbānō i, ante ædæmō ēñēnīnque, Tōmengä nānō änō iñōmō eyepæ pōni impā, ante ēñencæmīnimpā. Mänīnō ante ēñente cæte quēwēmō inte mōnō tōmengä tōnō godongāmæ waa tocæimpā.

<sup>3</sup> Wængonguī waadete pōnō cæcā ate botō nē apænebo badīmo inte iīmaī ante apænebopa. Mīnitō nämä pōnēnīnque, Ñænæmo imopa, ante pōnēnāmaī iedāni. Wængonguī pōnō badongä ate mīnitō wede pōnēmīni badīmīni inte mīni wede pōnenganca māningancaque pōnēnīnque iīmainō ante pōnēedāni. Botō önōmoque bai inōmo imopa, ante ocai encamīni inte tōō pōni pōnēedāni. <sup>4</sup> Mōnō baō adoyonque pōni ēñamō incæte wīi adodonque mōnō cæquēnēnō ante ēñamompā. Īnīnque mōnō aquīnō ante awīnca ēmōnīnque mōnō dao dao goquīnō ante önōwa ēwamompā. Ayæ wadō mōnō cæquīnō ante wayō ēñādinque mōnō wæætē wadō mōnō cæquīnō ante wayō ēñādinque wayō wayō mōnō ēñacoo ēñamompā. <sup>5</sup> Īnīnque wayō wayō

ēñamō incæ mōnō baō pæ pagænguincōo adoy-  
onque ī baī mōnō adobaī Codito nempo mōnō  
quēwencabo nanguī pōnī imō incæte adocabomō  
inōmō Imompa.

<sup>6</sup> Īninqe mōnō adocabomō iñōmonte Wængonguī  
waadete pōnō cædinque mōnō imonte wadō wadō  
mōnō cæquinō ante tōmānō pōnongā æmompā.  
Īninqe mōnō tōmengā da pōnongā mōnō ænganca  
edæ adoganca wadō wadō cæmompā. Mānōmaī  
ænte cædōmō iñōmonte pancamīniya imīnite  
Wængonguī pōnō apænecā ēñēninqe mīnitō  
tōmengā beyæ nē apænemīni do badinque wede  
mīni pōnenganca apæneedāni. <sup>7</sup> Wæætē wamīni  
imīnite Wængonguī pōnō cæcā æninqe mīnitō  
wadāni inānite nē cæmīni do badinque wadāni  
beyæ cæcæmīnimpa. Wæætē wamīni imīnite  
tōmengā pōnō cædinque odōmonte apænecā  
ēñēninqe mīnitō nē odōmonte apænemīni do  
badinque odōmonte apænecæmīnimpa. <sup>8</sup> Ayæ  
wæætē wamīni imīnite Wængonguī pōnō waadete  
apænecā ēñēninqe nē waadete apænemīni  
badinque mīnitō iñōmō wæntæye inte wædāni  
inānite ædæmō apænemīni ēñēninqe tōmēnāni  
wæætē edæ wampo pōnēninqe tæī piñænte  
cæcædānimpa. Wamīni imīnite Wængonguī  
pōnongā æninqe nē nēnempomīni badinque  
mīnitō, Tōmēmōni quī, ante wædāmaī inte wæætē  
wadāni nāni ænguēnēnō ante eyepæ godōmīni  
æncædānimpa. Wamīni imīnite Wængonguī pōnō  
angā ēñēninqe mīnitō wæætē awēnēidi baī  
nē āmīni badinque wadāni inānite nōingā cæte  
awēnēidi baī ancæmīnimpa. Wamīni imīnite

Wængonguī ædæmō waadete pönō waa cæcā æninqe mīnitō wæætē ædæmō waadete cæmīni do badinque wadāni inānite ædæmō waadete godō waa cædinque edæ wædāmaī inte tocæmīnimpa.

*Codito nempo quēwēninqe iūmaī cæcæimpa, ante*

<sup>9</sup> Botō waadete pönēmopa, ante tedomīni ininqe mīnitō nōinō cæte waadete pönencæmīnimpa. Wiwa mīni cædōnō ante pīninqe wido cæedāni. Wæætē, Quinō waa cæquīī, ante adinque mānīnō ante ænte mīnitō mīmōnē ædæmō entawēninqe cōwē waa cæte quēwēedāni. <sup>10</sup> Mōnō waadete pönencabo imopa, ante pōnēninqe wacā ingā wacā ingā waadete pōnente cæedāni. Wadāni ñænænāni inānīpa, ante mīnitō tōmēnāni inānite ængō cæte baī cædinque wæætē, Botō wædāmo imopa, ante nāmā ængō cædāmaī iedāni.

<sup>11</sup> Tæī piñænte ewocadinque mōnō Awēnē beyæ ante wæntædāmaī inte cæedāni.

<sup>12</sup> Watapæ bacæimpa, ante pōnēninqe tocæmīnimpa. Caate wæwēmīni incæte wæntæye badāmaī inte ee cæedāni. Ñimpo cædāmaī inte Wængonguī ingante cōwē apæneedāni.

<sup>13</sup> Wængonguī quīnāni ænguēnēnāni inte wædāni adinque mīnitō māincoo wæætē nēnempomīni æncædānimpa. Ayæ, Botō oncōnē pō guīite cænte mōedāni, ante wadāni inānite waadete cæedāni.

<sup>14</sup> Mīnitō imīnite nē piīnte cædāni iñōnānite mīnitō tōmēnāni inānite waadete godō apæneedāni. Edæ tōmēnāni inānite waadete apænedinque, Wængonguī mīnitō imīnite waa cæcæcāimpa, ante apænedinque wæætē piīnte änāmaī iedāni.

<sup>15</sup> Nē watapæ todäni tönö godongämæ watapæ toedäni. Nē Ca wædäni tönö mīnitö godongämæ Ca ca wæedäni.

<sup>16</sup> Mönö pönencabo imopa, ante adoyömö pönente quëwëedäni. Önönänique nāni nē änönāni tönö godongämæ cædinque, Botö ñænæmo imopa, ante pönenämaï iedäni. Mīnitö, Wadäni pönömenque ocai encayönāni botö godömenque nanguï pönï encabo imopa, ante nāmā ante pönenämaï iedäni.

<sup>17</sup> Wadäni mīnitö imīnite pönö wënæ wënæ cædäni adinque mīnitö wæætë godö wënæ wënæ cædämaï iedäni. Ayæ, Quïnö waa cæquïï, ante tömānāni nāni waa adönö ante adinque mīnitö mäninonque ante cædäni. <sup>18</sup> Eyepæ imīni inte mīnitö cæganca cædinque tömānāni tönö godongämæ piyænë cæte quëwëedäni. <sup>19</sup> Botö nē waademīni ëñeedäni. Mönö Awënë beyæ iïmaï ante yewæmongatimpa. “Wënæ wënæ cædäni adinque botö wënæ wënæ nāni cædinö beyæ ante nē apænte panguënëmo inte tömëmo eyepæ wæætë godö cæbo wæcædänimpa, ante Awënë angampa,” ante yewæmonte ongompa cæmīnii. Mīnitö imīnite pönö wënæ wënæ cædäni wæmīni ïninqe edæ wæætë godö cædämaï ee aedäni. Edæ nē äingä bate pänongä inte Wængonguï incæ pancæcäimpa. <sup>20</sup> Wæætë, “Bitö imite nē piïnte cædongä incæ gæwænte wæcä adinque godömi cængæ. Gue ænente wæcä adinque godömi becæe. Edæ mänömaï waa cædinque edæ tömengä guingo imonte nänö wæwenguinque bitö tömengä ingante waa cæcæbiimpa,” ante Wængonguï beyæ yewæmonte ongö apa cæbii. <sup>21</sup> Tömënāni wënæ

wënæ nāni cædō beyæ oda cædāmaï inte wæætē  
māninō ante wido cæte baï cædinque bitō waa  
cædinque edæ tæï ëmonte gānā cæe.

## 13

<sup>1</sup> Gobiedōno awënē nempo waodāni ëñente cæte  
quëwencædānimpa, ante Wængonguï incæ godō  
gō cæcā beyænque gobiedōno awënēidi badānipa.  
Edæ Wængonguï mānōmaï ante gō cædāmaï ingā  
baï quingānō awënē inguënengāā. Edæ dæ  
ancædōnimpa. Ìninqe gobiedōno awënēidi ìnānite  
mōnō tōmāmō Ao āninqe ëñente cæcæïmpa.

<sup>2</sup> Ìninqe awënē ingante æcānō Baa ānaa tōmengā  
nānō apænte pante wæquinque Wængonguï nānō  
goncægāinō ante ëñēnāmaï inte edæ Baa angampa.

<sup>3</sup> Nē waa cædāni guiquēnē awënēidi ìnānite waa  
ate todinqe guïñēnāmaï ìnānipa. Wæætē wënæ  
wënæ cædāni guiquēnē awënēidi ìnānite guïñente  
wædānipa. Gobiedōno awënē ingante guïñēnāmaï  
inte quëwencæboïmpa, ante bitō āmitawoo. Ìninqe  
bitō guïñēnāmaï inte quëwencæte ante waa  
cæcæbiïmpa. Waa cæbi adinqe tōmengā, Bitō  
waa cæbi abopa, ante pōnō waa cæcā ìninqe bitō  
guïñēnāmaï ìmaïmipa.

<sup>4</sup> Botō ìmote nē cædongā inte mīnitō beyæ waa  
cæcæcāïmpa, ante Wængonguï gobiedōno awënē in-  
gante godō gō cæcā ongongampa. Edæ Wængonguï  
ingante nē cæcā ìnongā inte tōmengā nē wënæ  
wënæ cæcā ingante nō cæte nē panguënengā  
ingampa. Ìninqe awënē yaëmē nē næægā inte  
wīï ònonque næægampa cæbii. Wënæ wënæ cæbi  
ìninqe edæ guïñente wæcæbiïmpa. <sup>5</sup> Ìninqe mōnō,

Pangä wæcæ wæ, äninge awënë ingante ëñente cæcæimpa. Ayæ pangä wæmō incæ wīi pangä wæmō incæ mōnō mīmō nē entawente nāmā apænte änōmō inte mōnō awënë ingante Ao ante ëñente edæ nöingä cæcæimpa. <sup>6</sup> Wængonguī beyæ nē cædōnāni inte awënëidi iñōmō tōmēnāni nempo quëwēnāni inānite cōwē aadinge māninge cæte quëwēnānīpa. Mānōmaī ī inique mīnitō, Awënëidi eyepæ æninge mōnitō beyæ cæcædānīpa, ante tōmēnāni nāni äinta pædæ godōmīni ænānīpa.

<sup>7</sup> Æcāmenque ingante cæquēnēmīni imīni inte mīnitō tōmānāni inānite mīni cæquēnenganca do godō cæmīni æncædānīpa. Awënë nempo quëwēñōmonte tōmengä eyepæ æninge mōnō beyæ cæcæcāimpa, ante mīnitō awënë nānō äinta godonguēnēmīni inte do godōmīni ængæedāni. Waocä ingante mīnitō guīñente ëñenguēnēmīni imīni inique tōmengä ingante guīñente ëñeedāni. Waocä ingante mīnitō waa aquēnēmīni imīni inique edæ tōmengä ingante waa aedāni.

<sup>8</sup> Wacä ingante mīni cæquēnēnō ante edæ ee ongōnāmaī inte godō cæmīni ængä ate abæ tawænte gocæbiīpa. Wæætē wacä ingä wacä ingä waadete mīni pōnenguēnēnō ante edæ godongāmæ cōwē waadete pōnenguēnēmīni imīnīpa. Wadāni inānite nē waadete pōnengä iñōmō tōmengä iñōmō Wængonguī nānō, Īimaī cæedāni, ante nānō wææ angainō ante do ëñente cæcä ingampa. <sup>9</sup> Tōmēmi nāmā bitō waadete pōnēnō ganca wacä ingante adoganca waadete pōnencæbiīpa, ante Mōitee wodi yewæmongacāimpa. Mānīne adodeque ante ëñente cædīnque waocä Wængonguī nānō wææ angainō ante tōmānō do īinque cæcampa. Edæ, “Bitō



nänöogængä inämaï iñongante godö guëa mönämäï ie. Wacä ingante godö wænönämäï ie. Wacä nänö äadincoo adinque godö ænämaï ie. Wacä wænæ wænæ cæcä atabopa, ante godö babæ wapiticæ apænedämaï ie. Wacä qui ante æinente wædämaï ie.” Mäninecoo Wængongui nänö wææ angainecoo ante bitö waadete pönemi beyænque tömäne do iinque cætimpä. Ayæ quinemë godömenque wææ ante i mänine adobaï bitö waadete pönemi beyænque tömäne do iinque cætimpä. <sup>10</sup> Në waadete pönengä iñömö edæ wacä ingante cöwë wiwa cädämaï ingampa. Mänömaï beyæ në ædæmö waadete pönänanique Wængongui nänö wææ angainö ante iinque cædanipa.

<sup>11</sup> Iinque, Ñöwoyedë æbänö oo baquii, ante do ëñëninque mïnitö waadete pönente quëwëedäni. Edæ wëenëñedë mä mönö wede pönëñedë mïnguipo mönö quëwenguimämo iñömö edæ mäniñedë edæ oo bacæ cädämaï ingatimpä. Ñöwo guiquënë, Oo pönï bacæimpä, ante pönente wædinque mïnitö möwocodë öñömïni inte edæ ñäni ömæmöninque mïmïni quëwëedäni. <sup>12</sup> Wëmö iñömö mönö wæwëmämo idæwaa edæ bapa. Mïnguipoga ñäo bai baquinque edæ oque pönente impä cæmöö. Wëmö iñonte mönö wænæ wænæ cædö æmæwo wido cædinque, mönö wæætë ñäo iñömö quëwëninque edæ wææ cæquincoo wëñate bai cædinque nämä wææ gompotawengæimpä. <sup>13</sup> Mänömaï cædinque mönö itæde quëwënömö inte nö pönï cæcæimpä. Baonique ante mönö cæinëwënö ante towënämaï inte mönö ti nämæ nanguï bete quidi quidi dowænämaï ingæimpä. Mönö wacä tönö godö guëa mönämäï, cængui

eyepæ cæninque godömenque nanguï cænāmaï ingæïmpa. Wæætedö wææte püinte cædāmaï inte mönö, Wacä bai bacæboïmpa, ante püinte adāmaï ingæïmpa. <sup>14</sup> Wææte wææ cæquincoo entawente bai cædinque mīnitö nämä wææ gompotawencæte ante cædinque mönö Awēnē Itota Codito ingante entawente quēwēedāni. Ayæ baonque ante mīni cæinēwēnō ante wido cædinque, Æbānō cæte wēnæ wēnæ cæquimoo, ante cæcæte ante wædāmaï iedāni.

## 14

*Mīnitö tönīñadāni inānite püinte änāmaï iedāni, ante*

<sup>1</sup> Wacä wīi ædæmō pönengä incæte mīnitö, Mönö pönencabo imōmpa, ante pönēninque tömengä adocabocä nānō baquinque ämīni pongæedāni. Tömengä nānō pönēnō ante wæætedö wææte änāmaï iedāni. <sup>2</sup> Pancadāniya wede pönēnāni inte cænguï adinque, Nāwä cænguï impa, ante guīñēnāmaï inte quīēmē cænguï incæ edæ dobæ ade cænānīpa. Wadāni guiquēnē æmæ pönente beyæ, Tömää baö baacä impa, ante awente bai cædinque quingāmenque baö incæ cænāmaï inte onguipoiya pæcooque edæ cænānīpa. <sup>3</sup> Incæte tömää cænguï nē cænongä iñömō onguipoiya pæcooque nē cænongä ingante püinte adāmaï incæcäïmpa. Wacä ingante, Bitö önömique bai inōmi inte edæ awente cænāmaï imīpa, ante änāmaï incæcäïmpa. Ayæ wææte onguipoiya pæcooque nē cænongä guiquēnē baö nē cænongä ingante, Baacä apa cæwēe, ante apænte ante pūināmaï incæcäïmpa. Edæ nē cænongä ingante Wængonguï Ao āninque, Botö quīmi imīpa, ante do

ængampa. <sup>4</sup> Iñæmpa tömengä wacä awënë ingante nē cæcä iñongante bitö ædö cæte apænte ämii. Edæ tömengä awënë incæ, Waa cæbipa, angä wædinque edæ tömengä adiyæ tæi ongömaingampa. Wæætē adocä tömengä awënë, Wënæ wënæ cæbipa, angä wædinque edæ tæ go wææmaingampa. Incæte edæ tömengä mönö Awënë ingante nē cæcä iñongante mönö Awënë adocä incæ tæi piñænogä inte eyepæ cædinque edæ æænö gö cæcä tæi ongoncæcäimpa.

<sup>5</sup> Ayæ wacä guiquënë, Pancaönaa godömenque waa eönæpa, ante cæcäimpa, ante pönëñongante wacä guiquënë, Tömää itädē önönæque impa, ante pönengampa. Ìninqe mönö pönencabo wacä wadö wacä wadö pönëmö incæte mönö tömämö iñömö edæ, Nämä botö pönënonque ante botö nö pönente cæcæboimpa, ante edæ mäninonque ante cæcæcäimpa. <sup>6</sup> Edæ, Pancaönaa godömenque waa eönæpa, ante nē pönengä guiquënë tömengä mönö Awënë ingante waa adinque mänömainö ante cæcampa. Pancaönaa wii godömenque waa eönæpa, ante nē pönengä guiquënë tömengä adobaï mönö Awënë ingante waa adinque mänömainö ante cæcampa. Baö nē cænongä guiquënë Wængongui ingante, Waa pönömi cæmopa, ante adobaï mönö Awënë ingante waa adinque cængampa. Baö ate nē awente cænämaï inongä guiquënë tömengä adobaï Wængongui ingante, Waa pönömi cæmopa, ante onguipoiya pæcooque cæninque mönö Awënë ingante waa adinque baö cænämaï ingampa.

<sup>7</sup> Mönö pönencabo iñömonte æcämenque incæ nämä beyænque dicæ quëwengää. Dicæ nämä

beyænque wængää. <sup>8</sup> Wæætë edæ quëwëmö ïinque mönö Awënë beyænque quëwëmpa. Wæætë edæ wæmö ïinque mönö Awënë beyænque wæmpa. ïinque quëwëmö incæ wæmö incæ mönö Awënë quïmö ïnömö inte quëwëinque tömengä quïmö inte edæ wæmpa. <sup>9</sup> Edæ do wængainäni beyæ ante mümö quëwëmö beyæ ante Codito tömämö Awënë nänö baquinque edæ wænte ñäni ömæmongacäimpa.

<sup>10</sup> Bitö guiquënë bitö tönïñacä ingante ædö cæte apænte ämii. Ayæ bitö tönïñacä ingante, Önömique bai ïimpa, ante quïnante ämii. Edæ Wængongui nänö apænte anguimpaa gäänë ongöñömonte tömengä tömämö ïmonte apænte ancæcäimpa cæbii. <sup>11</sup> Edæ Wængongui beyæ ante ïmaï ante yewæmonte on-gompa.

“Mönö Awënë incæ, ‘Në Quëwëmo ïnömö inte edæ ämo ëñëedäni,’ angampa.

Ayæ, ‘Minitö tömämïni botö önöwa ïnö da guicapod-  
inque,

Bitö Wængongui ïnömi ïimpa, ante adoyömö apænecæminimpa,’ angampa.”

<sup>12</sup> Ante näni yewæmongainö bai ïinque cædinque mönö tömämö Wængongui weca ponte ongöinque mönö pönengainö ante mönö apænegainö ante mönö cægainö ante tömengä ingante edonque pönï apænecäimpa.

*Wacä oda cæcæcäimpa, ante cædämaï incæbiimpa, ante*

<sup>13</sup> Mänömaï beyæ mönö wacä ingante apænte änämaï ingæimpa. Wæætë minitö, Waa cæcæboimpa, ante nämä wææ cædinque, Botö

töniñacä taadö nänö goquino ante ee acæboimpa, ante pönëedäni. Tömengä tee tewate bai oda cädämaï incæcäimpa, ante nöingä cæquinque ante pönencæminimpa. <sup>14</sup> Botö iñömö Itota Codito nempo quëwëmo inte edæ nöingä pönëninque, Tömää cænguï nämä incæ näwäaquiringä impa, ante do ëñëmopa. Incæte wacä, Pancaa cænguï baacä impa, ante në pönengä inte tömengä beyæ baacä iñonte tömengä nänö, Baacä impa, änö cænämaï inguënengä ingampa.

<sup>15</sup> Bitö quingämë cæmi adinque bitö töniñacä, Baacä apa cæwëe, ante wæwente bacä inique bitö waadedämaï inte godömenque cæmaïmipa. Edæ bitö töniñacä beyæ Codito wængacäï apa quëwëe. Bitö töniñacä nänö pönënämaï bate wænguinque baö cæmipa, ante wædinque bitö tömengä ingante näwangä waadete pönëmi inte tömengä beyænque ante cöwë baö cænämaï incæbiimpa. <sup>16</sup> Botö mänömaï cædinque waa pönï cæbopa, ante pönëmi incæte wadäni bitö waa cädö ante, Wiwa cæbipa, ante pönö babæ ante tedewënäni ate wædinque bitö wæætë waadete pönëninque wææ ämi tedewënämaï incædänimpa. <sup>17</sup> Wïi cænguinque ante wïi bequinque ante Wængonguï nempo quëwëmompä. Wæætë Wængonguï Tæiyæ Waëmö Önöwoca nempo quëwëñömönte tömengä pönö cæcä æninque mönö nö entawenguinque impa. Ayæ mönö gänë pönenguinque ante mönö watapæ tote quëwenguinque ante tömengä nempo quëwëmompä. <sup>18</sup> Edæ Codito nempo quëwëninque waocä mänömaï cæcä adinque Wængonguï tömengä ingante waa ate tocampä. Waodäni

adobai, Waa cæbipa, ante waa adänipa.

<sup>19</sup> Mänömaï impa, ante adinque, Mönö pönencabo godongämæ piyænë cæte quëwengæimpa, ante, Ayæ mönö godongämæ wede pönëninque tæi mænonte bai ongongæimpa, ante mönö nanguï cæcæimpa. <sup>20</sup> Ìinque cænguï cæinente beyænque bitö Wængonguï nänö në badongainäni inänite bæ tadämaï incæbiimpa. Tömää cænguï edæ näwaaquingä impa. Incæte bitö cæninö beyænque wacä ëñënamäi inte tee tëwate bai oda cæbaingampa, ante do ëñëmi inte bitö godömenque cæmi ìinque wïwa cæbaimipa töö. <sup>21</sup> Waa cæcæte ante bitö iïmaï cæcæbiimpa. Bitö baö cæmi beyæ, biinömæ nani wædænque ti nämæ bebi beyæ, quiëmë cæbi beyæ bitö tönïñacä oda cæte wæcantawo. Ìinque bitö iñömö, Botö tönïñacä oda cædämaï incæcæimpa, ante wææ cædinque ee cædämaï ìmi ìinque waa ìmaimpa.

<sup>22</sup> Mäninö, Æbänö cæte waa inguïi, ante bitö pönënö beyænque wadäni inänite apænte änämaï inte bitö adobique inte Wængonguï ayongante cæcæbiimpa. Waa cæqui impa, ante mimöno bitö pönënonque ante mäninonque cædinque bitö tente wæquinque cædämaï inte waa tobaïmipa. <sup>23</sup> Wæætë në æmä pönengä guiquënë, Cæmo beyæ Wængonguï pangä wæcæ wæ, ante wædingä inte tömengä nämä nänö apænte pante wæquinque ade cængampa. Edæ æcänö wede pönënamäi inte cæda tömengä nänö cædönö tömänö edæ wïwa cætimpa. Ìinque bitö cædö tömänö wede pönente cæcæbiimpa.

## 15

*Wadäni incæ watapæ quëwencädänimpa, ante cæe, ante*

<sup>1</sup> Mönö nē wede pönēmō iñömō tæi piñænte entawēmō inömō inte nāmanque ante mönō cæinēnō ante edæ wädāmaï ingæimpa. Wæætē edæ nē æmæ pönēnāni guiquēnē tōmēnāni aquīi pōni ināni inte, Ædō cæte cæquimoo, ante wädāni adinque mönō tōmēnāni wädō ante ænte mongænte bai cædinque tōmēnāni tōnō iñacabo cæcæimpa. <sup>2</sup> Godongāmæ godō cæmō æninque waa toдинque tōmēnāni wæætē wede pönēninque oncō tæi mænonte bai tæi ongoncädänimpa, ante mönō ædæmō cæcæimpa. <sup>3</sup> Edæ mönō Codito incæ nāmanque ante nānō cæinēnō ante cæcæte ante edæ wädāmaï inte piyænē cægacäimpa. Wængonguï ingante do nāni apænegainō bai tōmengä wadäni beyænque ante cægacäimpa. “Wængonguï ëñēmi. Wadäni bitō imite piinte badete tocæte ante cædinque botō imote wæætē piinte badete todänipa,” ante apænete bai Codito ee cægacäimpa. <sup>4</sup> Edæ mönō imonte odömōnte apænecæte ante Wængonguï angä ëñēninque dodäni tōmantaa yewæmongadänimpa. Ìninque mäninta ædæmō adinque wampo pönēninque wæntædāmaï inte ee cæmō ìninque edæ mönō, Watapæ bacæimpa, ante pönente tocæimpa.

<sup>5</sup> Ìninque Codito Itota miñæ tee empote goyōmōnte Wængonguï iñömō edæ, Minitō wampo pönēninque wæntædāmaï inte ee cæcæminimpa, ante nē ædæmō cæcä ingampa. Tōmengä mänōmaï pönō cæcä ate minitō iñömō adoyōmō ante mīni

pönencabo bacæminimpa, ämopa. <sup>6</sup> Mänömaï bamïni ïnïnque mïnitö äanque bai adodö ante pönëninque ïïmaï ante Wængonguï ingante apænecæminimpa. Mönitö Awënë Itota Codito Mæmpobi ïnömi inte bitö tömengä Wængonguï adobi ïmi ïñömö bitö tæï emömi inte ñäö apäite bai ïmi amönipa, ante adoyömö ante apænecæminimpa, ante botö mänömaïnö ante yewæmömopa.

*Oodeoidi inämaï inäni eñencædänimpa, ante*

<sup>7</sup> Codito mïnitö ïmïnite Ao ante ængacäimpa. ïnïnque tömengä mïnitö ïmïnite nänö ængai bai mïnitö adobai wacä ingä wacä ingä godongämæ Ao ante æedäni. Mänömaï cæmïni adinque wadäni Wængonguï ingante apænedinque, Bitö waa pönï cæbi amönipa, ante watapæ pönï apænecædänimpa. <sup>8</sup> Edæ apænebo eñeedäni. Mönitö mæmæidi inänite Wængonguï, Minitö beyæ pönö waa cæcæboimpa, angacäimpa. ïnïnque, Wængonguï tömengä nänö angainö ante cöwë cæcæcäimpa, ante oodeoidi eñencædänimpa, ante cædinque mönö Codito tömënäni beyæ në cæcä bagacäimpa. <sup>9</sup> Tömengä ïñömö, Idægoidi inämaï inäni incæ Wængonguï ingante, Bitö ñäö bai emömi inte pönö waadete waa cæbi æmönipa, ante apænecædänimpa, ante mänömaï cægacäimpa. ïïmaï ante Wængonguï beyæ nani yewæmongainö bai impa.

“Botö mänömaï beyæ, Bitö æbänö në waa cæbi ïmii, ante idægo inämaï inäni weca gote apænecæboimpa.



Bitö emöwo ante ämotamini watapæ pöni ancæboimpa,” ante nani yewæmongainö bai Codito cægacäimpa.

<sup>10</sup> Ayæ wataa iñömö iimaï ante yewæmongatimpa. “Idægoidi inämaï imini incæ minitö Wængongui quinäni tönö godongämæ watapæ toedäni.”

<sup>11</sup> Ayæ wæætë,  
“Idægoidi inämaï imini mönö Awënë ingante apænedinque, Bitö waa pöni cæbi amönipa, ante watapæ pöni apæneedäni.

Wamini mini cabo mini cabo tömämäni ämotamini ante bai apænedinque, Waa pöni cæbi amönipa, ante watapæ pöni apæneedäni.”

<sup>12</sup> Itaiya wodi adobainö ante yewæmongacäimpa. “Inguipoga quëwënëni tömänäni Awënë baquinque

Awænguinto tä bocate bai cædinque Yæte Pæingä iñömö ængæ ganticæcäimpa.

Tömengä cæcä beyænque watapæ bacæimpa, ante idægoidi inämaï inäni incæ pönencædänimpa,” ante Itaiya wodi yewæmongacäimpa.

<sup>13</sup> Wængongui iñömö, Watapæ bacæimpa, ante në badongaingä inongä inte iimaï cæcæcäimpa, ämopa. Tömengä Tæiyæ Waëmö Önöwoca tæi piñænte cæcä ate minitö, Watapæ bacæimpa, ante godömenque wede pönencæminimpa. Mänömaï cæcæte ante cædinque Wængongui pönö apæneca ëñëninque minitö tömengä ingante wede pönëninque edæ gänë entawëninque watapæ tocæminimpa, ämopa.

<sup>14</sup> Botö töninamini ëñëedäni. Botö tömömo ayömote minitö në waa cæmini imini abopa.

Ayæ, Æbänö waa cæquï, ante do ëñëmini iminipa. Ayæ adobai minitö eyepæ imini inte wacä ingä wacä ingä do odömonte apænemini iminipa, ante pönëmopa. <sup>15</sup> İninque botö, Minitö ëñëninö ante minitö ocai encadömini inte edæ adodö ante pönencæminimpa, ante bai cædinque pancadea ante yewæmontabopa. Botö iñömö Wængongui waadete pönö cæcä ænte në entawëmo inte mänömainö ante yewæmöninque edæ guiñënamai inte nanguï ante yewæmömopa. <sup>16</sup> Edæ tömengä waadete pönö cæcä ænte entawëninque botö Itota Codito beyænque ante idægoidi inämai inäni inänite në cæbo badinque Wængongui ingantedö ante watapæ apænebo ëñënanipa. Mänömainö ante apænebo ëñëñöminite Wængongui Tæiyæ Waëmö Önöwoca pönö badongä ate idægoidi inämai inäni incæ tæiyæ waëmö ewocate quëwënanï badänipa. Mänömai bayönänite botö iñömö, Wængongui quï, ante pædæ godönäni bai cædinque tömënanï inänite ante edæ, Wængongui quïmini bacæminimpa, ante pædæ godömo æninque Wængongui wæætë waa tocampa.

<sup>17</sup> Mänömai beyæ botö Itota Codito nempo quëwëninque Wængongui beyæ cædinque edæ nanguï tobopa. <sup>18</sup> Codito botö tönö guëa cæcä beyænque botö nanguï apænedinque nanguï cæbo ate tömengä iñömö töö æmængä pöninque edæ idægoidi inämai inäni incæ edæ Wængongui ingante ëñente cædäni badänitapa. Botö Codito mänömai botö tönö nänö cædinö ante apænedinque edæ mäninque ante apænedinque guiñënete wædinque godömenque apænedämai incæboimpa. <sup>19</sup> Wængongui Tæiyæ Waëmö Önöwoca

tæi piñænongä inte botö tönö godongämæ cæcä ate botö, Eñencædänimpa, ante bamönengæ cæbo ate nē pönēnāni badānitapa. Mänōmaï Eedotadēē iñōmō mā cæte godinque Ididiabæ ganca tōmāo godāmæ godinque botö Codito ingantedö ante watapæ apænedinque adodö adodö ante tōmänö ante apænebo eñēnānitapa.

<sup>20</sup> Botö, Codito emöwo ante wadāni nāni apænedāmaï iñōmō gote tōmengä ingantedö ante watapæ apænebo eñencædänimpa, ante cōwē goinente wætabopa. Wacä onguitanca nānō tæñōnincōnē æmonga mænōnāmaï incæboimpa, ante bai cædinque botö, Wacä do nānō apænediñōmō botö wæætē apænedāmaï incæboimpa, ante cætabopa. <sup>21</sup> Wæætē iūmaï ante Itaiya wodi nānō yewæmongainö bai cætabopa.

“Tōmengä ingante ante eñēnāmaï iñināni incæ edæ do ate bai ewocacædänimpa.

Önōmonca eñēnāmaï iñināni incæ edæ, ‘Æbānō i,’ ante do eñencædänimpa.”

Ante nānō yewæmongainö bai botö, Eñencædänimpa, ante cætabopa.

### *Odömä iñōmō pöinēmopa, Pabodo angampa*

<sup>22</sup> Mänōmaï beyæ botö mīnitö weca poncæ cæyōmote edæ, Wææ cæte i, ate wædinque pōnāmaï intabopa. <sup>23</sup> Iñōmō ömæ idæwaa cæbo inte botö æpomē wadepo iñonte mīnitö imīnite aīnente wædōmopa. <sup>24</sup> Iñinque botö, Iñcayæ ate Epāñabæ gocæ cædinque wodo tebæ godinque mīnitö weca eñate aboque gocæboimpa, ämopa. Edæ botö wantæpiyæ eñate tote quēwente ate godōmenque

Epäñabæ gote cæyömo mīnitō botō beyæ cædinque da godömini gocæboimpa.

<sup>25</sup> Ñöwo guiquēnē botō tāno Eedotadēē iñömō Wængonguī quīnāni beyæ godō cæcæte ante gobopa. <sup>26</sup> Wængonguī quīnāni incæ Eedotadēē quēwēnāni pancadāniya ömæpodāni inte wædānipa, ante pönente wædinque wabæca Mäatedöniabæ quēwēnāni tönō Acayabæ quēwēnāni tönō, Mönō da godō da godō cæcæimpa, ante pönēninque watapæ todirque tōmēnāni, Wængonguī quīnāni quī, ante do godönānitapa. <sup>27</sup> Mänömainō ante watapæ pönente cædāni incæte tōmēnāni Eedotadēē iñömō quēwēnāni inānite nē godonguēnēnāni inte da godönānimpa. Edæ Wængonguī Önōwoca nānō pönongaincoo ante idægoidi pönō apænedāni ēñente ænte ewocadināni inte wabæca quēwēnāni iñömō tōmēnāni nāni éadincoo incæ idægoidi beyæ ante wæætē godonguēnēnāni badīnāni inānipa. <sup>28</sup> İninque botō iñömō mänincoo tōmēnāni nāni da godöincoo idægoidi weca ænte gocæboimpa. Godinque botō cōwā adinque, Nē ömæpodāni inte nē wædānique æncædānimpa, ante wææ cæcæboimpa. Ædæmō cæbo ænāni ate botō māniñedē ate Epäñabæ gocæte ante cædinque mīnitō ömæ wodo tebæ godinque mīnitō weca ēñacæ poncæboimpa. <sup>29</sup> Codito pönō waa cædinque da pönongā pöninque botō cōwē tōmengā tönō waa pōni botō cæquinque mīnitō weca poncæboimpa, ante do ēñēmopa.

<sup>30</sup> Botō tōniñamīni ēñēedāni. Botō pæ pagænte bai nanguī cæyömete mīnitō iñacabo cædinque botō beyæ Wængonguī ingante nanguī apæneedāni,

ante botö mönö Awënë Itota Codito beyænque äninque ayæ Wængonguï Önöwoca në waadete pönengä beyænque äninque mīnitö imīnite nanguï ämopa. <sup>31</sup> Oodeabæ pönēnāmaï ināni iñömö Pabodo ingante wēnæ wēnæ cædāmaï incædānimpa, ante botö beyæ ante apæneedāni. Ayæ, Eedotadēē iñömö botö gote cæbo adinque Wængonguï quīnāni incæ botö cædö ate Ao ancædānimpa, ante apæneedāni. <sup>32</sup> Mänömaï i adinque botö, Awënë Wængonguï angä ate botö watapæ todinque mīnitö weca pömo ate mönö godongämæ guēmāninque wampo pönengæimpa, ämopa. <sup>33</sup> Wængonguï në gänē pönengä inte mīnitö tönö godongämæ ongöninque pönö cæcä ate gänē pönencæmīnimpa, ämopa. Mänömaï impa diyæ, ante botö, Amēē, ämopa.

## 16

### *Waa quēwencæmīnimpa, ante*

<sup>1</sup> Botö iīmaï ämopa. Mönö tönīñacä tömengä emöwo Pebe mīnitö weca ñöwo poncæ cæcampa. Tencodea iñömö Codito ingante nāni godongämæ pönencabo iñönānite tömēnāni beyæ në waa cæcä inte iingä onquiyængä iñömö waingä pōni ingampa. <sup>2</sup> Tömengä nanguï ināni beyæ wææ gompodinque waa cædongä inte botö beyæ adobaï nanguï cæcantapa. İninque edæ botö mīnitö imīnite iīmaï ämopa. Wængonguï quīmö inömö inte mönö Awënë nempo quēwēñömonte Pebe adocä inte adobaï ingampa, ante adinque mīnitö tömengä ingante waa adinque Ao ante æedāni. Ayæ

tömengä quïemë æinente wæcä iñongante mïnitö wæætë edæ godö cæedäni ämopa.

<sup>3</sup> Ayæ wada Pidotida tönö Aquidæ nāna gæncaya iñömö Itota Codito nempo quëwëninque edæ botö tönö godongämæ cæda inapa. Ìninqe mïnitö tömëna inate, Waa quëwencæmïnaimpa, ante botö beyæ ante apænemïni ëñcædaimpa. <sup>4</sup> Wadäni botö imote wænoncæ cædäni wæyömote tömëna nāna wodo wænguinque edæ botö imote wææ cædatapa. Mänömaï cædapa, ante botö tömëna inate waa ate pönente apænebopa. Ayæ idægoidi ināmaï ināni Codito ingante nāni wayömö pönencabo wayömö nāni pönencabo adobaï tömänāni Aquidæda nāna cædinö ante ëñëninque tömëna inate waa ate pönëninque apænedänipa.

<sup>5</sup> Ayæ Itota Codito ingante në pönënāni Aquidæda oncönë godongämæ pö guidäni inānite, Waa quëwëedäni, ante apænemïni ëñncædänimpa. Botö æmigo Epëneto botö në waadecä iñongante mïnitö botö beyæ apænedinque, Waa quëwencæbiimpa, ante apæneedäni. Atiabæ iñömö Codito ingante wadäni pönënāmaï iñönāni tömengä iñömö tano pönengantapa. <sup>6</sup> Ayæ Mäadiya mïnitö beyæ nanguï cædingä iñongante mïnitö wæætë tömengä ingante Waa quëwencæbiimpa, ante apæneedäni. <sup>7</sup> Botö guidëna Antodönico tönö Ññiato iñömö botö tönö godongämæ tee mönete wædina inapa. Tömëna iñömö botö pönënāmaï iñömote wëenëñedë Itota Codito nempo quëwëna iñönate Codito incæ tömëna inate da godongacäimpa. Ìninqe, Itota Codito nänö në da godongaina tänoda ina

adinque mīnitō botō beyæ ante tōmēna īnate waa apæneedāni.

<sup>8</sup> Ayæ wacā mōnō Awēnē nempo quēwēnīnque Ampīdiato ingante waadete pōnēmo inte edæ botō, Waa quēwencæbiimpa, āmopa. <sup>9</sup> Ayæ adobaī Odōmāno mōnitō tōnō godongāmæ Codito nempo quēwente nē cæcā īñongante, Waa quēwencæbiimpa, ante botō beyæ ante apæneedāni. Botō

nē waadecā Etaquito ingante adobaī ante apæneedāni. <sup>10</sup> Ayæ Apede īñōmō Codito nempo quēwēñongante tōmengā æbānō cæcāā, ante adinque Codito tōmengā ingante wæætē, Waa cæbi abopa, angampa. Tōmengā ingante botō beyæ ante waa apæneedāni. Ayæ Aditobodo nāni quēwencabo īnānite adobaī waa apæneedāni.

<sup>11</sup> Botō guīdengā Edodiyaōnō ingante waa apæneedāni. Ayæ Nāadotito guīdēnāni incæ æcānō mōnō Awēnē nempo quēwēna tōmēnāni īnānite adobaī, Waa quēwencæmīnīmpa, ædāni.

<sup>12</sup> Ayæ wada mōnō Awēnē nempo quēwēna onquiyæna Tidipīna tōnō Tidipota īñōmō nē nanguī cæda īnapa. Tōmēna īnate botō beyæ ante waa apæneedāni. Ayæ wacā onquiyængā mōnō nē waadecā Pedetida īñōmō tōmengā mōnō Awēnē nempo quēwēnīnque nanguī cæcantapa. Tōmengā ingante adobaī, Waa quēwencæbiimpa, ædāni.

<sup>13</sup> Ayæ mōnō Awēnē nānō nē apænte ængaingā Odopo ingante waa apæneedāni. Tōmengā badā incæ adobaī botō badā baī īñōnante tōmēnā īnate botō beyæ ante waa apæneedāni. <sup>14</sup> Ayæ adobaī Atīncodito, Pedegonte, Edēme, Patodobato, Edēma tōmēnāni nāni pōnencabo tōmānāni īnānite, Waa quēwencæmīnīmpa, ante apæneedāni. <sup>15</sup> Ayæ

wadāni Pidodogo tönö Oodia, Nēedeo tōmengā mængā tönö, Odimpa tönö Wængonguī quīnāni tōmānāni inānite, Waa quēwencæmīnīmpa, ante apæneedāni.

<sup>16</sup> Edæ, Waa quēwencæmīnīmpa, ante mīnicabo incæ tōmāmīni godongāmæ waa waadete apænecæmīnīmpa. Codito ingante wayōmō nāni pōnencabo wayōmō nāni pōnencabo tōmānāni mīnitō imīnite wæætē, Waa quēwencæmīnīmpa, ante ānānīpa.

<sup>17</sup> Botō tōnīñamīni ēñēedāni. Mīnitō adocabomīni iñōmīnite wadāni æmæmoncadō æmæmonca pā cædāni inānite cōwā adīnque edæ Baa æedāni. Doyedē mīnitō ēñēnō ante ēñēnāmaī ināni inte tōmēnāni, Mīnitō tee tēwate baī oda cæcæmīnīmpa, ante cædīnque wadō ante edæ odōmōnānīpa cæmīnīi. Tōmēnāni inānite gomō aquēnē cæmīnīi.

<sup>18</sup> Mānōmaī cædāni iñōmō mōnō Awēnē Codito ingante cædāmaī inte nāmā nāni cæīnēnonque ante cædānīpa. Tōmēnāni ante, Mīnitō imīnite waa amōnīpa, ante waa tedete baī tededāni ēñēnīnque pancadāniya guīquēnē, Babæ wapiticæ impa, ante cōwā adāmaī ināni inte, Nō impa, ante do pōnēnānīpa.

<sup>19</sup> Mīnitō cōwē ēñēnte cæmīni imīnīpa, ante tōmānāni do ēñēnānīpa. Mānōmaī beyæ botō iñōmō nanguī tobopa. Incæte, Quīnō waa cæquīī, ante mīnitō ædæmō ēñencæmīnīmpa, ante aīnēmopa. Quīnō wēnæ wēnæ cæquīī, ante edæ ædæmō ēñēnāmaī inte edæ gomō acæmīnīmpa, ante aīnēmopa. <sup>20</sup> Wængonguī, Gānē pōnente quēwencæmīnīmpa, ante nē pōnō cæcā iñōmō edæ Tatāna ingante mīnitō ōnōwa gāānē wææntodongā ate mīnitō wæætē do pīnā



gäwate bai cæcæminimpa. Ñowo iñömö mönö Awënë Codito nänö waadete pönö cædö incæ entawencæminimpa, ämopa.

21 Botö tönö guëa cædongä Tımoteo iñömö minitö iminite, Waa quëwencæminimpa, angampa. Ayæ botö guidënäni Dotio tönö Yatönö adobai Totipatedo adobai minitö iminite, Waa quëwencæminimpa, änänipa.

22 Ñowo botö Tedetiyobo iñömö Pabodo önöneque tedecä ëñëninque iï cadota ante në yewæmönimo inte botö adobai, Waa quëwencæminimpa, ämopa.

23 Gayo adobai minitö iminite, Waa quëwencæminimpa, angampa. Tömengä oncönë Codito ingante nani pönencabo cöwë godongämæ ponte apænedänipa. Ayæ tömengä botö imote adobai, Pöe, angä ëñëninque edæ botö ñowo tömengä oncönë owobopa. Ayæ iñömö quëwënäni awënë nänö äinta æninque adocanque Edaato nani änongä iñömö tömengä, Tömänäni beyæ æbänö cæquii, ante në angä iñömö tömengä tönö mönö tönïñacä Coadoto adobai, Waa quëwëedäni, änapa.

24 Mönö Awënë Itota Codito minitö iminite pönö waadete cæcæcäimpa. Mänömaï impa, ante botö, Amëë, ante ämopa.

*Wængonguï ingante waa ate apænecæimpa, ante*

25 Ñowo iñömö Wængonguï ingantedö ante watapæ botö apænedö ante ayæ Itota Codito ingantedö ante mönö apænedö ante në pönëmini inte minitö tæi piñænte ongoncæminimpa. Wængonguï eyepæ inte mänömaï pönö cæcæcäimpa. Tömengä mäninö ante ñowo tæcæ

nānō odömōnō ante wēēnēñedē pedæmāmo iñonte cōwē wantæpiyæ wē wodonte bai cægacāimpa. <sup>26</sup> Ñōwo guiquēnē, Codito æbānō cægacāi, ante inguipoga tōmāmæ quēwēnāni ēñente wede pōnēninqe botō imote ēñente cæcædānimpa, ante cædinque Wængonguī cōwē nē Quēwēnongā inte do odōmongā acæimpa. Tōmengā angā ēñēninqe tōmengā beyæ nē apænegaīnāni wæætē edonque pōnī yewæmōnāni acæimpa.

<sup>27</sup> Īninqe Wængonguī nō pōnī ēñēnongā inte adocanque Wængonguī ingampa, ante adinqe mōnō, Bitō adobique ñāō bai emōmi inte edæ waa cæbi amōnīpa, ante mōnō Itota Codito emōwo apænedinqe Wængonguī ingante edæ cōwē apænecæimpa. Mānōmāi impa diyæ, ante botō, Amēē, amopa.

**Wængonguī nänö Apænegainö**  
**New Testament in Waorani (EC:auc:Waorani)**

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

9bedab5a-39ff-5163-a35b-8056cbbe8690